

Kálag e'só echě Paalε áténlé **Baá Kōrinto** **Ndibned n kálag**

Kálag e'só eche Paalε átélé, bad bé Krīsto ábe bédé á mwembé n Kōrinto bōō ántelée chō. Paalε átélé enén kálag tñgēne ndutul éche bad bé mwembé békúdáá á alongé ádab, békudé-'ε ndutul tñgēne ádab adúbe. Póndé echě Paalε átélé enén kálag, dyad á Kōrinto dōō ábédé nló n dyad á mbwóg e Akaya á póndé e nkamlēn e bad bé Roma. Adē dyad démbyēēn bwāmbwam áyāl e mekan nēngáne nyongé echě etómnádtáá áwed, mekan mé mbwóg nímāb bémbyēēn mó kúmbe, abel dé mekan mé mbinde déntōm áte áwed, bébénlé'áá-'ε myōb híin.

Mekan nime Paalε ákóó awéd áte médii nkabén ne mbinde e mekan éche édé á mwembé-te. Ahóbe kóōne tñgēne nyaa echě bad bēnōnēé e'wóngé, nlém nime bad bētāngéné awōñ átii ké dyam ábóó káa déeboo'é, nyaa echě Edāádāñ éche Esáá ébageé bad nde ne tñgēne mpuu. Akoó alúmed áte chōm éche nkalan n bwām n hóbēé tñgēne nímén mekan.

A eped dyōm ne é'láán Paalε ahóbe tñgēne edānge. Echě eped chō-'áá bad bétómténé abii átínté e enén kálag esyāól.

Nkabtéd n kálag

Ndibned 1.1-9

Nkabén nime ndé a mwembé-te 1.10-4.21

Mekan mé mbinde ne alongé á túmbé 5.1-7.40

Mbèltéd ní Bad bé Krìsto ne bad ábe béedúbpe
 Krìstàà 8.1-11.1
 Alongé á mwembé ne abele á Dyöb 11.2-14.40
 Mpuu míme Krìstàà ne ní bad bé Krìsto 15.1-58
 Nde eche béládté bad bé Krìsto bé Jerusalem
 16.1-4
 Mekan míme ménone bad bèn ne nsógtɛn 16.5-
 24

¹ Mɛ Paalɛ, awě Dyöb ápwédé ábé mbapɛɛ a nlómag awě Yesu Krìstàà ngáne Yesu Krìstàà apwédé mɛ ábé awě mbapɛɛ ngáne Dyöb déntíí'ɛ, mɛ ne Sostɛnɛ, awe syánē mwānyan, séē sētēnlé nyé enén kálag.

² Mwembé ní bad bé Dyöb ábe bédé á dyad á Kòrinto, nyéē nitenléɛ enén kálag. Dyöb áchénlé nyé ábé ábē bad ábe bésáá. Asánté-'ɛ nyé abé áde nyédíí ne Yesu Krìstàà. Melemlem nê dáo ápwédé bad bémpee ábe bédé hóm-téé, ábe bébenlad dín áde awe syánē Sánḡwéé, Yesu Krìstàà. Adíi awab Sánḡwéé, abé-'ɛ awe syánē.

³ Nsimé ne nsan míme níhúú ne Dyöb, Titéɛ awéd ne míme Sánḡú Yesu Krìstàà, níbê ne nyé.

*Paalɛ aságnan Dyöb áyāl e
 mwembé ní Kòrinto*

⁴ Nságnan Dyöb pónde téé áyāl echên, áyāle nsimé míme ábágé nyé mbwiined ne Yesu Krìstàà.

⁵ Abé áde nyédíí mod nhóg ne Yesu Krìstàà ábélé Dyöb ábágé nyé chóm ésyāāl nyaa eché elóné mbon. Abelé nyékale nímē nkalan nyaa eche ehɛdnad, nyēsónḡténé-'ɛ mam mésyāāl bwám tâḡɛne nímē mekan.

⁶ Nén álúmte bán nkalan t̄ηgene Yesu Kr̄ist̄æ míme sékánlé nyé nkóó nyé asól á nlém-tê.

⁷ Né-óó, nyéetógéé ndε ké póg ábele Dyöb, ngáne nyésinéé pónidé eche Sánjú Yesu Kr̄ist̄æ álümēdtē yǎl.

⁸ Sánjú Yesu Kr̄ist̄æ mwën-εé äbël adúbe áwúú nyé áte kááηne á asóg dé nkõηsé äbel nén á epun éche ápéé ákáad bad, bad béehöbē bán dyam dé mbéb ké ahóg áde áde nyébélé.

⁹ Dyöb ábele' ngáne áhóbé aá móöbël, mó apwεdé-'ε nyé äbé mod nhóg ne awe Mwän, Yesu Kr̄ist̄æ.

*Paale áá nkabén méēbāg
átintê e bad bé Dyöb*

¹⁰ A-baányan, ncháa' nyé á d̄in áde Sánjú Yesu Kr̄ist̄æ nén mēé, nyé moosyáál nyépe á nchemtēn áyāl e kéchéé éche nyéhóbeé äbel bon nkabén méēbāg átintê echên. Bon pen nyébê mod nhóg á mewēmtēn ne áyāl e kéchéé éche nyéhóbé bán nyébele'.

¹¹ A-baányan, nhóbe nén áyāle bad ábe Kloo bélángé με bán nyé bēn ne bēn nyēsēnle'.

¹² Chöm éche nhóbeé édii nén, átintê echên, baahóg béhóbe' bán "Ndii mod awě ahíde ayáge áde Paale", donje bán, "Ndii mod awě ahíde ayáge áde Apolose", ábíní bán, "Nhíde ayáge áde Petro", bémpēe-'ε bán "Ndii mod awě ahíde ayáge áde Kr̄ist̄æ."

¹³ Nédē nyéhede ahób bán Kr̄ist̄æ akäbné áte-yε? Με Paale-εé bēmboméé á awog á nló mímēn'ε? Ké'ε á d̄in ádēm, με Paale, dóo bēndusénné nyé?

¹⁴ Nságnan Dyöb nén mēé menkēndusénné nyé modmod éetóméé Krispusε bó Gayos.

15 Né-ᵛó, nyé modmod nyéēhēlēē se nyéhób bán nyékudé edusen á dīn ádēm.

16 (Mendusén kóōne abum á ndáb áde Stefanuse. Méēkāmānnē pen me ndūséné mod ampée.)

17 Krīstəə enkēnlómmé me ádusen bad. Boḡ pen anlóm me ákal nkalanj ní bwām, menkāl-le mó ésebán mbenlad e'yale ábe é'lúmte debyéé á moonyoḡ. Nzé membēnléd e'yale ábe é'lúmte debyéé á moonyoḡ né nkalanj tḡḡene kwééd eche Yesue áwédé á awᵛḡ, méebáá dyamdyam.

Paale aá Krīstəə adii ngine ne debyéé á Dyöb

18 Dyam áde níhóbéé ádíi nén, nkalanj tḡḡene kwééd eche Krīstəə áwédé á awᵛḡ nídíi chōm éche édé eyókél wée bad ábe békě á dū á muú. Boḡ ne syánē bad ábe békūd e'soosḡ, nímmē nkalanj nídíi ngine e Dyöb.

19 Eténlédé á kálag e Dyöb nén bán Dyöb áhóbé aá,

“Měbel debyéé áde bad ábe bēwēmtan bán bēwóó debyéé ányīnnēd nén déesaá dyamdyam, mēlūmēd-te nén meé bad ábe bēwēmtan bán bēbíi dyam, bēebíi'ē dyamdyam.”

20 Né-ᵛó, élúmté nén bán mod a debyéé eesaá dyamdyam, meléede a mbéndé a bad bé Israel eesaá dyamdyam. Bad ábe bēlāḡe bad mekan ne debyéé enén pónde béesaá dyamdyam. Dyöb álúmté aá debyéé dé nkōḡsé ádíi eyókél ngēn.

21 Ngáne édíi bán Dyöb ábēnlédé áde debyéé ábel boḡ bad bé nkōḡsé bēbenlād ádab debyéé ábíi mó, mó Dyöb amaá atíi aá móᵛsōḡ alonḡé á bad ngáne bédúbpe nkalanj níme sékaléé tḡḡene

Krīstəə. Kénée bad ábe béēbīi Dyōb bétédé nén bán póle e e'yókél é' bad chóa sékaléé.

²² Bad bé Israel bédəə bán bényīn e'chemléd é' menyáké boŋ bédūbē, bad bé Grikia-ε béhede debyéé áde áchábé ámīn.

²³ Boŋ sé pen, sékale nén bán Krīstəə, Ane-awě-Béwógté, anwé á awog. Ne bad bé Israel, nímé nkalaŋ nídii dyaŋ áde bénkēndəŋgé awóg ne awóg dēn, ne bad ábe bó-ε béesě bad bé Israel, nímé nkalaŋ nídii eyókél ngēn.

²⁴ Boŋ Dyōb áchénlé donge á bad ábé ábē bad. Bó donge á bad bédii bad bé Israel, ábíní-ε bad bé Grikia. Ne ábén bad nímé nkalaŋ níme sékaléé nídii Krīstəə, mó adé ngīne e Dyōb, mó-aá adé debyéé á Dyōb.

²⁵ Chōm éche ényīnnad née eyókél é Dyōb étómé debyéé á moonyoŋ. Eche chó-ε ényīnnad née ewəmwəŋ é Dyōb, étómé ngīne e moonyoŋ.

²⁶ A-baányan, nyékamten nyaa é bad éche nyébédé á pónde eche Dyōb áchénlé nyé ábé ábē bad. Bad bé nkōŋsé bényīn nyé nguse é bad née bad ábe béwóó debyéé. Nyé nguse é bad nyébédé benkamlenε. Nyé nguse é bad nyēmbíd á túmbé é benkamlenε.

²⁷ Boŋ Dyōb ápwédé bad ábe bad bé nkōŋsé béntēdté née e'yókél é' bad. Abelé nē ákwáged bad ábe béchágé yəl á nkōŋsé-te nén bán béwóó debyéé. Dyōb dēmpwěd-te bad ábe nkōŋsé ményīnnē née bad ábe béesě etógnén. Ambel nē ákwáged benkamlenε.

²⁸ Dyōb dēmpwěd bad ábe bad bé nkōŋsé bényīnnē bán bédé nkóŋtéd, ápwēd ábe bényīnnē bán béesaá dyaŋdyam, bad ábe

bennyinnē bán béesaá dyam dé abelen. Dyōb dēmbel nē álúmed nēn aá mam níme bad bé nkōjsé bényínēé bán médé etógnén, méesaá chōmchōm.

²⁹ Ambēl nē âbel boŋ modmod eékūmē' ekáá á tâl á'sō é' Dyōb.

³⁰ Chōm éche ábēnlé nyé chōo ékáá boŋ nyēbé mod nhóg ne Yesu Krīstəə. Mekan níme Yesu Krīstəə âmbenlé, ne syánē, debíí bán ádíi debyéé á Dyōb. Nédē, Yesu Krīstəə mós abelé boŋ syánē débélé mekan níme métāŋgéné, debé bad ábe bésáá, mós-'aá akōdté syánē á mbéb-te.

³¹ Né-ōó, étēnlédé á kálag e Dyōb nēn bán "Kēnzéé awē akume ekáá á tâl, ákume' ekáá á tâl dásō áyāle dyam áde Sāŋgwéé ábēnlé mós."

2

*Paale abēnlédé ngine e Dyōb
ákal nkalan tãŋgene kwééd eche Yesue*

¹ A-baányan, áde nípédé áwēn ákale nyé nkalan níme ríhóbe mam tãŋgene Dyōb, * meébenlád-taá e'yale é'mbáá ké'ε debyéé ámbáá.

² Membel nēn áyāle áde mbédé átíntē echēn memmād á nlém-tē nēn mēé méebenlé dyam démpēe éetóméé ákal nkalan tãŋgene Yesu Krīstəə ne kwééd echē áwédé á awōg.

³ Ade mbédé ne nyé menkēnkwoŋnédte mmēn âbel nsón, mbwōg mbédé mē áte, nlém ríhūnē-'ε mē á abum.

⁴ Ade rí'yágté'áá nyé, ríkanlé-'ε nyé, póle echē rílánge'áá nyé eebédéé póle echē etéde bad nlém á

* **2:1** Mam tãŋgene Dyōb; donge á kálag dé'só áwóó: mam tãŋgene mekan mé e'koŋnéd mé Dyōb.

abum echē edé debyéé ámbáá áte. Meékanle'áá-'ε nyé ne debyéé ámbáá ábel nén nyédúbe chōm éche rílanḡeé nyé. Boḡ pen áde ríkánlé'áá nyé nkalan rí Dyōb, mekan míme ríhóbé'áá mélúmté'áá bán ngíne e Edáádəḡ é Dyōb edé áwəd-te.

⁵ Meéħede'áá meé nyédúbe nkalan rí Dyōb áyāle mod ábénlédé debyéé ámbáá ákale nyé mó. Boḡ nhedáá meé nyédúbe míme nkalan ngáne Dyōb dēn ábénlédé eche ngíne ábel nyédúbe.

Debyéé áde áhúú ne Dyōb

⁶ Kénê-'ε ámpē, nzé sēdé ne bad ábe bémáá awúu áte á adúbe-tē, sēbelé sébenlád debyéé nzé sēkanle bó póle. Adē debyéé pen déebāḡkē debyéé áde mod a nkōḡsé ábenladté. Déesaá-'áá debyéé áde ké benkamlenε bé nkōḡsé bé' chii bébenladté. Abē benkamlenε bédíi bad ábe mímab nkamlen mébēē á esōḡ é pondé.

⁷ Debyéé áde sébenladté ádíi debyéé áde Dyōb ábágé sé. Sēkale ntíi rí kun míme Dyōb ábénlédé ádē debyéé abel. Ngen e'só Dyōb dénkēnlúmédte modmod mímén ntíi áte. Mmén ntíi míme Dyōb átíídé ahóbé áá syánē ámpē dēbē ásē e éche ehúmé á pondé echē ehúé'. Dyōb déntíi áá móḡbelé syánē nē se áde éēhāḡēē nkōḡsé.

⁸ Nkamlenε a nkōḡsé ké nhóg enkēnsóḡténne ádēn debyéé á Dyōb. Áyāle nzé bēnsōḡtēn chōm éche Dyōb ábéláá, né bēnkēnwúú'ē Sāḡḡwéé a edúbé abome áde bēmboméé mó á awōḡ.

⁹ Boḡ kénê-'ε ámpē, éténlédé á kálag e Dyōb nén bán,

“Mam míme Dyōb ábōḡséné ábele ábē bad ábe bédáá mó, médíi mam míme modmod éēnyīnēē mbéd,

nīmē modmod éēwōgēē mbêd,
 nīme modmod éékāmtēnēē-’aá áwe nlém-tē
 mbêd.”

¹⁰ Mmén mekan mós Dyōb álúmté syánē. Echē edáádāη chós ánlōmmē álúmed syánē nīmén mekan. Edáádāη énōne mekan mésyāāl áte, ébíi-’ε mekan mésyāāl, káōηne mekan mé Dyōb nīme mod éehelēé-se awámsén asōηten.

¹¹ Modmod eebýéé’ε mewēmtēn mé mod ampée. Edáádāη éche édé mod áte chós ébyéé’ nīmē mewēmtēn. Melemlem nē dós modmod éebíi’ε mewēmtēn mé Dyōb, étōméé Edáádāη é Dyōb.

¹² Edáádāη éche syánē déwóó éhúú ne Dyōb. Deewóó’ε edáádāη é nkōηsé. Dyōb ábágé syánē échén Edáádāη ábel désōηten mam mésyāāl nīme ábééné syánē nīmē nsimé.

¹³ Né-ός, séēbēnlādtē e’yale ábe moonyōη ábēnladté áde debyéé áyáged bad. Bōη sēbēnlād e’yale ábe Edáádāη é Dyōb élyágteé sé áhób. Sēbēnlād e’yale ábe Edáádāη élanγεé sé tēηgene nīmē mekan.

¹⁴ Mod awē eewóó Edáádāη é Dyōb áte eedúbpréé mekan nīme Edáádāη é Dyōb élanγεé bad áyāle anyíne mós eyókél. Ééhēlēē-’ε mós asōηten áyāle Edáádāη éche Esáá chēmpēn chós éwōηgan bad ádol mekan mé Dyōb áte bwām.

¹⁵ Mod awē awóó Edáádāη áte ádol mekan mésyāāl áte bwām. Bōη modmod eéhēlēē-se asōηtén mewēmtēn nīme ane mod.

¹⁶ Edé nēn ngáne éténlédé á kálag e Dyōb nēn bán,

“Nzé-módé abíi mewēmtēn nīme Sāηgwéé?

Nzé-módé ahele se aléb-pe mós?”

Boŋ syánē dewóó mewêmtēn níme Krīstā.

3

Paale ad bembaledε bé Dyöb bōó bō moosyáál bédii

¹ A-baányanŋ bé Krīsto, meéhele'aá sé nláá nyé mekan ngáne rílanŋgeé bad ábe adúbe ádāb áwúú áte áyāl e mekan mé Dyöb. Boŋ nlánŋgé'aá nyé mam ngáne rílanŋgeé bad ábe béwóó mewêmtēn mé moonyoŋ a ekob. Nyêbédé née nkáál, mentéd nyé née bad ábe bêmbootéd ábé mod nhóg ne Krīstā.

² Abíi dōó nkáál rímwáa'é, eedyágké ndyééd echē elelé. Né-'aá me-'ε mêmbootédte nyé mam níme méelēle áte tñŋene nkalanŋ rí Dyöb ayáged. Menkényágédte nyé mam níme méwúú áte, áyāle ene pónde nyênkênkwogké ákob mó. Ké bōob-pe nyéékwoḡgēē ákob mó.

³ Ayāle nyédii nyéhíde' mekan mé ekob é yāl, nyéwánléné nhóg ne aníní kónjí, nyé bēn ne bēn nyéswanŋtán-ne. Bōob áde nyédii nyébeléé nímén mekan éélūmtēē bán nyédii nyéhíde échēn esíí é mekan mé ekob é yāl-ε? A mbále, nyébeléé née bad ábe béwóó dásō nsōŋtēn ní moonyoŋ.

⁴ Chōm éche ékás boŋ ríhōbē nēn édii nēn, áfíntē echēn bad behóg béhóbe bán, “Ndii mod awē ahíde ayáge áde Paale,” ábíní-'ε bán, “Ndii mod awē ahíde ayáge áde Apolose.” Enén ndín e mbeltéd elūmte' bán nyéwóó dásō nsōŋtēn ní moonyoŋ.

⁵ Bōob-pōó, nzéé Apolose ádíí? Nzéé me, Paale-'ε rídíí? Bembaledε bé Dyöb ngēn bōó sédíí. Sēwōŋgéné nyé ádúbe Krīstā. Sé mod téé abele nsón níme Sánŋwéé ábágé mó aá ábel.

⁶ Ndii mod awě awéné mbál-e-bũ, Apolose-ε mó adé mod awě asyogé'áá ene mbál mendíb áyāl, boŋ Dyōb dáo dēmběl boŋ mbál ríkwoge' saké sé.

⁷ Né-óó, mod awě awéné ne mod awě asyogé mendíb bó modmod béesaá etógnén. Mod awě adé etógnén adii Dyōb. Mó abele boŋ mbál ríkwoge'.

⁸ Mod awě awéné ne mod awě asyogé mendíb bébeleé nsón nhóg, Dyōb désābe-ε bó mod téé nchoo ne nsón míme ábélé.

⁹ Bembaledε bé Dyōb ábe bébele nsón nhóg bóó sédii. Nyé bad ábe nyédúbpé-ε nyédii nēngáne nzag echě Dyōb áwóó. Nhele rihəgtén-ne nyémpē ábē nēngáne ndáb echě Dyōb álóó'é.

¹⁰ Mběnlédé nsimé míme Dyōb ábágé me ábel nsón nēngáne nlóó-ndáb awě awóó debyéé álón ndáb. Mensáá nsón ní Dyōb áfinté echēn, bembaledε bémpēe béκεεné nsón míme nsáádé á'sō. Boŋ kénzée awě alóó' atəngéné atéd pónde ngáne álóó'é ámīn e nsón míme bémáá asáa.

¹¹ Ayāle modmod éēhēlēē-se ábel nsáaned mémpēe éetóméé míme mímáá abel. Mmē nsáaned nídii ayáge áde ní'yágté nyé tēngene Yesu Krīstə nén mεé, Dyōb ásoo' áded alongé mbwiined ne Yesu Krīstə.

¹² Donje dé bembaledε bébenlad bwēm nēngáne gól, sílva ne meláá mé etógnén áκεεn mímé nsón á'sō. Bembaledε bémpēe-ε bébenlad bwēm bé nsón bémpēe ábe é'bíde áyāl e mel, ne ábe é'dé byaá, áκεεn nsón á'sō míme bésáádé.

¹³ Pónde epě echě moosyál anyinnē nyaa e nsón echě mod téé ápédé abel. Ayāle á epun éche Yesuε ápéé ábidēd mam mésyāēl áwed. Ebē nēngáne mod awě ahédé bwēm á dũ, boŋ muú mbēl anyín éche

éhēle-se éhyán ne eche éehelé-se éhyán.

¹⁴ Nzé nsón míme mbàledε ábélé ámīn e nsón míme bémáá asáa méehyáa, né ákud nsábe.

¹⁵ Boη nzé nsón míme mbàledε ábélé ámīn e nsón míme bémáá asáa níhyáá, ane mbàledε éekudté chōmchōm, boη kénê, mwēn ádii abé mod nhóg ne Krīstæ. Boη pen ábē nēηgáne mod awē abídné mehélé á ndáb-te echē ehyaá. Adii abé á alonjé boη chōm ésyāāl éche áwóó émad ahyán.

¹⁶ Ndúbpé meé nyēbíí bán nyēdii abón áde Dyōb ádyεε'é áte. Edæádæη é Dyōb édé áfīnté echēn.

¹⁷ Kénzée awē abéhte abón á Dyōb, Dyōb débēbēd ane mod, áyāle nēn wée Dyōb ádyεε'é ádii hōm áde áde ngæηgú. Nyébēn-naá nyédé áde hōm áde áde ngæηgú.

¹⁸ Modmod eédōgē yāl. Kénzée awē awémténé áfīnté echēn áá mówōō debyée á nkōηsé-te wēn, átimed yāl eyókél é mod ábel boη ákon debyée awón.

¹⁹ Nlānge nyé nēn áyāle, dyam áde bad bé nkōηsé bényíneé bán áde debyée dōō Dyōb ányíneé née eyókél é akan. Debíí bán nēn áde mbále áyāle éténlédé á kálag e Dyōb nēn bán, “Bad béwēmtan bán béwóó debyée boη Dyōb ábenlad ádab debyée dēn ákób ádab akwáb.”

²⁰ Éténlédé ámpē nēn bán, “Sāngwée abíí áá bad ábe béwēmtan bán béwóó debyée ádab debyée déesaá dyamdyam.”

²¹ Né-ǎó, modmod eékūmnē baányon ekáá á tâl, áyāle nyéē Dyōb ábágé bwēm é'syāāl.

²² Dyōb álómé me, Apolose ne Petro áwōηgen nyé. Bwēm é'syāāl ábe Dyōb áhágé á nkōηsé, abagé nyé bó ábenled. Ké nyébé á alonjé ké'ε nyēwé,

Dyōb ábélé nê á mboŋ nímēn. Mekan-ne níme mébenlad ne nyé bəəb ne níme mébenléd ne nyé á póndé eche ehúe' á'sō, médii á mboŋ nímēn. Abén bad bésyāal ne ábén bwēm é'syāal Dyōb ábágé nyé b́.

²³ Nyēdii bad ábe Krīstəə, Krīstəə mó-'e abé ane awě Dyōb áwóó.

4

Paale aá Dyōb ápwédé b́ ábele Krīstəə

¹ Nyétéd sé nēŋgáne bad ábe bébenle Krīstəə, ábe Dyōb ábélé aá bélánge bad mekan mé e'koŋnéd.

² Chǝm éche éhəd nad bán échē ndín é bembəlede bébel édíi ábel nsón bwām níme echab sán ábágé b́ aá bébel.

³ Boŋ me meewóó'é póndé ábel ne kéchéé éche nyé ké'e mod ampée áwóó áhób t̄ŋgene nsón níme Dyōb ábágé me aá mbel. Ké mmēn meehóbéé t̄ŋgene nsón níme mbelée, ké mbóó ké'e mééboo'é.

⁴ Meenyínée awusé ké ahóg áyāl e nsón níme mbelée boŋ nê déelūmtēē nén bán chǝm ésyāal éche mbelée ét̄ŋgéné. Sán gwée mwēmpen mó abíi nsón níme mbelée, ké n̄t̄ŋgéné ké'e méēt̄ŋgené.

⁵ Né-ó, nyéehóbé bán mod abelé nsón ní bwām ké'e abelé nsón mé mbéb áde póndé éēpēdēē ábel nê. Ene póndé ēpě áde Sán gú Yesu Krīstəə ápéé. Ade ápéé, ábidéd bwēm ábe é'bédé á ehíntén-tē á e'nyínen bé ekide abídéd-te bad mewēmtēn áwed níme modmod énkēmbíí'é. Ene póndé dó-'aá Dyōb dékenné mod t̄éé ngáne ápédé nsón abel.

⁶ A-baányan b́ Krīsto, nhóbe' nímēn mésyāal áyāl echēm ne Apolose áwóŋgen nyé ásōŋten. Ntéde sé bad bébe nēŋgáne eláŋsén ábel nyéyáge

e'yale ábe béhóbεé nén bán “Mod ábele dásō mekan míme méténlédé.” Modmod ekumné mod nhóg ekáá á tâl se ányíné aníní nkóntéd.

⁷ Dyöb áhágé mod nhóg etógnén tómaa aníní-ye? Cheé mod ádíí éche Dyöb déebelεé boη abé? Cheé-ō mod ákuménné ekáá á tâl, áde édíí bán kéchéé éche mod ádíí Dyöb dōō ábélé mós?

⁸ Bōōb nén nyêlúmte byánán nyêwóó chōm ésyāāl éche nyétógnéné. Nyêlúmte byánán nyésudé nhōn. Nyétědté sé bembøledε, nyé bēn nyêwēmtan bán nyédíí kâη. Mendāη nén mεé nyékoη kâη abé âbel boη sémpē sékamlan ne nyé.

⁹ Nwēmtan nén mεé Dyöb ábélé aá sé bembapεε bé nlomag sébê nēηgáne bad ábe béesě etógnén átínté e bad. Sédíí nēηgáne bad ábe bétómté mbakú bán béwê. Nhóbe nén áyāle bad bésyāāl bēnōne sé ányín chōm éche ébenlad ne sé. Saá-kaá bad bēnpēn boη kóāη ne ángel énōne sé.

¹⁰ Bad bényíne sé née e'yókél é' bad áyāle sébenléé Krístā. Boη nyépēn nyêwēmtan bán nyêwóó debyéé áyāle nyédíí nhóg ne Krístā. Bad béwēmtan bán séewóó'é ngíne âbel dyamdyam boη nyêwēmtan bán nyêwóó ngíne echě ehúú ne Dyöb. Bad béebagéé sé edúbé boη bébage nyé edúbé.

¹¹ Káāηne ne bōōb, séewóó'é chōm éche sédyágkē ne éche sémwágkē. Séewóó'é mbóté éche ékwógé sé ahé. Sēyōgkē mbéte akud á mekáá mé bad. Séewóó'é wéε sédyεε'é.

¹² Sébele ntũ ní ngíne âbel boη sékud chōm éche séwōηganné échæd yāl. Nzé bad bésyāā' sé sêlāηge bó bán mekan mébéen bó bwām. Nzé bad bébele sékude metake, sêwesān.

13 Nzé bad béhóbe sé mekan mé mbéb áyāl, sêhóbe bó mekan mé bwám áyāl. Ké bɔɔb bad bédíi bényíne sé mbinde áwab díd-te. Séēsaá dyam dé abelɛn áwāb.

14 Ntele nén saké áwóged nyé e'són bon ntenle nyé áléb nyé t̄ngene mekan míme nyét̄ngéné abíi. Ayāle nyédíi n̄ngáne ábêm bān ábe ndáá.

15 Kénée édíi bán nyéwóó bemeléede bé Krīsto híin, mod nhóg mwēmpɛn mó adé n̄ngáne sáá awên. Apɛɛn áde mípínédé nyé nkalanj mí bwám ábélé ndíi n̄ngáne sáá awɛn a Krīstəə.

16 Né-ɔ́, ncháa nyé nén meé nyébele mekan míme mémpē mbelée.

17 Nén dɔɔ akáá bon n̄lōmē Timotiɛ áwɛn. Adíi n̄ngáne awem mwān á d̄in á Sāngú. Ndəá mó, ayǔgkē-'ɛ mekan abel ngáne éhɛdnadté. Nzé apedé ákamtén nyé nyaa e alongé eche n̄wóó n̄ngáne mod a Krīsto. Ene nyaa e alongé edé nchoo ne ch̄m éche n̄'ýagtéé mwembé ké r̄héé míme r̄kagké áte áyáged.

18 Nyé donje á bad nyêdé kúmbe, nyéwēmtān bán méepaá áwɛn.

19 Bon nzé Sāngwéé akwěnténé, nkwogé apɛ áwɛn. Ene pónde-'aá méhɛdté áte ábíi ch̄m éche ábê bad ábe bédé kúmbe békoo'ɛ abel. Mébīi ké békónté ngíne awónj eché ehúú ne Dyǔb ké'ɛ nsal ngên móo bébelée áte.

20 Nkamlɛn ní Dyǔb méesaá ch̄m éche édé á nhóbtéd, bon r̄díi ngíne eché elúmté' á mbeltéd.

21 Ahée abǔnnédé nyé, nyédəá bán nzé mpedé áwɛn r̄kógsan nyé áyāl e kúmbe eche nyédíi ké'ɛ nyédəá bán nzé mpedé n̄lúmed nyé nlém mé edənge, r̄chedne nyé yāl?

5

*Paale ahábé tâṅgene akáb
dé mesón á mwembé ní Kōrinto*

¹ Nwógé nén bán mod nhóg átíntê echên akábe asón, nyaa e asón echê ké bad ábe béebíi Dyöb béehelée se békāb. Chöm éche rihóbeé édii nén mée, mod nhóg átíntê echên akábe asón ne sáá mwaád.

² Chán-nō nyéhēle nyébé kúmbe áde édii bán ane mod mímē mbéb rítāṅgéné nyé dāsō ndutul awóged. Mó awě abele enén ndín e dyam, nyétāṅgéné née nyénáné mó átíntê echên.

³ Nhóbe mée nyébel nê áyāle kénéē méesaá ne nyé, nkamtan nyé pónde téé. Nhóbe byánán ndé ne nyé nén mée mmaá mbakú atómed,

⁴ ne kunze eche Sánḡú Yesu Krīstəə ábágé me, nhóbe nén mée nyékógsen ane mod awě abélé mímē mbēb. Nzé nyēlādné, ébē byánán ndé ne nyé, awed Sánḡú Yesu Krīstəə ábe nyé ḡíne ábel kéchéé éche nyéwémténé abel.

⁵ Nhede mée nyébe ane mod á mekáá míme Satané ábel bon Satané ábébed échē ekob é yāl. Kénéē édii bán Satané ábēbēd échē ekob é yāl, Yesuē āsōṅ échē edəádəṅ á epun éche ápéé ákáad.

⁶ Nyéetāṅgené kúmbe abé. Nyébii nén bán mbumé ní ngun risonle' nzé béhéde mwă esulten áwēd-te, melemlen nê dōo ane mod awě abelé mímē mbéb áhēle ábel bad bémpēe bébel mbéb.

⁷ Nyéhūd esulten é nchun ésyāāl, ábel bon nyébé nēṅgáne mbumé mékōlē míme méēwóo esulten, né-'aá nyékóó abé. Nyédé nén áyāle Krīstəə anwé á nló mímēd. Mó ambé née Mwăn-a-Ndyōṅ ní mbód awě bēmbéé née mende mé ngande e Nnyíme-ámín, áyāl e mbéb ní bad.

⁸ Né-ṳṳ, nyéwôg menyinge ne ene ngande, esulten é nchun éēbāg ámpē. Abé ádēd ábê pónde ésyāal nēngáne abé á bad bé Dyōb, deébēlē e'bébtéd é' mekan, deebébé-'ε nlém á abum. Boη pen déwōη abé dékōōlē, déhíde Krīstəə ne nlém nhóg, dékale-'ε mbále.

⁹ Kálag echē mēntelēé nyé menláá nyé mēé nyéēhōñné' bad ábe békábe mesón.

¹⁰ Saké bad ábe béedúbpe Dyōb bōō ríhóbaá, kénéε édíí bán bó donge á bad békábe mesón, bédé ngoód, bédé bechíb, donge ábenlé-'ε myōb mé metóm. Weéhēlēε-se ebáη échén ndín é bad á yāl káōη né ehídté á nkōñsé.

¹¹ Boη bad ábe mēntelēé nyé mēé nyéēhōñné bédíi bad ábe béchágé yāl bán bédíi bad bé Krīsto boη békābē mesón, bébé ngoód, bēbagé myōb mé metóm edúbé, bēhōbē bad mekan mé mbéb á yāl, bémwāg mīm bwāmbwam mékōbē bó, bēbé-'ε bad ábe béchíbe'. Nyéedyág ké ndyééd ne échén ndín é bad.

¹² Meewóó'é kunze ké póg áhób mēé békógsen bad ábe béesē bad bé Dyōb. Bad ábe bédé á mwembé-te bōō nyétāngéné akógsen.

¹³ Dyōb dōō dékāād bad ábe béesē á mwembé-te. Eténlédé á kálag e Dyōb nén bán, “Nyéhúd mod awē abele mbéb átínté echén.”

6

Mod eesámné mwānyaη wéε bad ábe béedúbpe Krīstəə

¹ Nzé nyé mod ké ahéé awánléné mwānyaη a Krīsto dyam, éekāg wéε mod awē eedúbpe Krīstəə

aá ákáad b́. Boŋ pen áke wée bad bé Dyõb ábel bétimed b́ ásē.

² Nyébíi nén bán bad bé Dyõb b́ békāād bad bé nkõŋsé. Né-ɔ́, ngáne édíi bán nyéēkāād bad bé nkõŋsé, nyétāŋgéné née nyékāadtēē mpíntéd mé mekan.

³ Nyébíi bán syánē-éé dékāād ángel. Née édíi-'aá nê, chán-nō déheléé baá mam ábe bétoge mbóó átíntē echēn mbwē-téé amad?

⁴ Né-ɔ́, nzé échê ndín é mam épédé átíntē echên, nyéētím chó née atéd, nyékēēn wée bad ábe mwembé méētédēē née dyam bán b́b́ bémade nyé chó-yē?

⁵ E'sôn ne nyé. Nédē modmod eésaa átíntē echên awē awóó debyéé ákóm nsaŋ átíntē e mod b́ mwānyan ábe b́wánléné-yē?

⁶ Boŋ mod atime mwānyan ákēen á kóte, bad ábe béedúbpe Dyõb békāadtē-ē búmā.

⁷ Asómēn áde nyésâmnēé nhóg ne aníní á kóte álúmte bán nyékwédé ne akwē dēn. Edé mboŋ mwānyon ápanēn wē tómaa wē ákēen mó á kóte.

⁸ Boŋ nyétíme nyépanne, nyédoge-ē nhóg ne aníní, nyébele nê kááŋne wée baányon bé Krísto.

⁹ Nyébíi nén bán bad ábe bébele e'bébtéd é' mekan béebáá á nkamlēn ní Dyõb. Modmod eédōgē nyé. Bad ábe békábe mesón, bad ábe bébenle myõb mé metóm, bad ábe békábe mesón á ndáb e e'wóngé, baachóm ábe bénaŋnad baáb baachóm bémpeē, ábén bad bésyāāl b́ modmod béebáá á nkamlēn ní Dyõb.

¹⁰ Bad ábe béchíbe', bad ábe bédé ngoód, bad ábe b́bágé yāl á amwé á mím, bad ábe b́hóbe bad mekan mé mbéb á yāl ne bad ábe bédumne bad

bwēm bó modmod béebáá á nkamlen ní Dyöb.

11 Nyé donje á bad nyêbeláá échén ndín é mekan. Boŋ á dīn áde Sāngú Yesu Krīstæ ne á Edædæŋ éche ádæd Dyöb, béhúdé nyé mímén mbéb á yäl, nyêdé bad ábe bésáá, Dyöb ábánné nyé née bad ábe bésáá, nyêkõbnédé-’ε á’sõ é’ Dyöb.

Nyêbenlad échen yäl ábe Dyöb edúbé

12 Nyé mod nhóg ahele ahób áá, “Nwóó kunze ábel kéchéé éche ndáá abel.” Nê ádé mbále. Boŋ pen saké chõm ésyāäl éche mod ábeléé éwõŋgan. Mod ahele ahób áá “Nwóó kunze ábel kéchéé éche ndáá abel.” Boŋ chõm ké éhéé éetāŋgenéé née étedéé me ntāŋ.

13 Mod ampée ahele ahób áá “Bébélé ndyééd áyāle abum, bébēl-le abum áyāle ndyééd.” Nê ádé mbále. Boŋ Dyöb débēl ábē bwēm bépě á asóg. Dyöb déebeléé alongé á moonyoŋ áá bébenle mbinde é mekan boŋ abelé dó áá bébenle Sāŋgwéé, Sāŋgwéé mó-’áá atogne yäl e moonyoŋ.

14 Dyöb dēmpuúd Sāŋgwéé, nê dó-’áá ábenlédte eche ngine āpuud syānē.

15 Nyéebii’ é nén bán échen yäl chõõ édé pág éche ébélé yäl eche Yesuε-yε? Né-õó, nhele ntéd pág é yäl éche Krīstæ boŋ níke nílatén ne yäl e akwalεε-yε? Éetāŋgenéé abé nê mbéd!

16 Ké’ε nyéebii’ é bán mod awě atédé eche yäl boŋ álatén yäl e akwalεε abelé búmõ bétímé yäl póg-ε? Eténlédé á kálag e Dyöb nén bán, “Échē yäl ébe étim yäl póg.”

17 Boŋ mod awě mó-’ε adé nhóg ne Sāŋgwéé abele átim mod nhóg ne mó á edædæŋ.

18 Nyéewóó' é dyam dé abel ne mbinde é mekan. Mbé́b ké ŕhéé mémpēe míme mod ábeléé méenənéé eche yǎl. Mod awě akábé asón abelé mbé́b t̃ngene eche yǎl.

19 Nyéebii' é bán échen yǎl édií abón áde Edə́ədə́n éche Ēsáá édyεε' é áte-yε? Dyǒb d́óo ábágé nyé échen yǎl. Saké nyé nyéwóó ch́ó, Dyǒb d́óo áwóó nyé.

20 Dyǒb ácháné nyé ne nkun míme ŕchábé ámin. Né-ɔ́, nyébenled échen yǎl ábe Dyǒb edúbé.

7

Paale alébe bad t̃ngene e'wónge

1 Bɔɔb-pɔ́, mǎlā́ nyé t̃ngene mekan míme nyétélé á kálag echě nyéténlé me. Ebóó bán mod eewóó' mmwaád.*

2 Boŋ ngáne édií bán akáb dé mesón ábuú áte bwāmbwam, ébóó bán mwenchóm téé áwōŋ awě mmwaád, mmwaád téé-'ε awōŋ awe nchóm.

3 Mwenchóm téé at̃ngéné ábelé' mekan míme mwenchóm at̃ngéné mwaád abele, mmwaád téé-'ε at̃ngéné ábelé mekan míme mmwaád at̃ngéné nchóm abele.

4 Mmwaád mwēn eékamlánné eche yǎl, nchóm mó akamlan mó, melemlem nê d́óo mwenchóm eékamlánné eche yǎl, mwaád mó akamlan mó.

5 Nyé ábe nyéwónné, mod ké nhóg eebáŋné waáb e'noŋ é'sē, éetóméé né nyé bēn nyéchēmténé bán nyébel nê á esōŋ é póndé, ábel boŋ nyéwōŋ póndé e bwām ákáne. Boŋ pen ámbid e nê nyét̃ngéné

* **7:1** Eewóó' mmwaád, donje á kálag áwóó: eénaŋáád mmwaád.

abé ámpē ngáne nyénsēbēē abé, ábel boŋ Satane eépiinád nyé mekágsen ákáb asón.

⁶ Meehóbéé nén meé nnyágte nyé ábel nê, boŋ nhóbe meé nê dóó ébóó bán nyébel.

⁷ Mendǎŋ pen meé bad bésyāāl bēbê áde béewōŋneé née me. Boŋ mod téé awóó nde eche Dyōb ábágé mó. Abelé donge á bad aá béwōŋ mewēmtēn áwōŋ mmwaád ké'ε nchóm, ábēl-le ábíníí aá béewōó'.

⁸ Bōōb-pōó nlānge nyé bad ábe béewōó bebaád ké'ε bechóm ne ábe bédé bekúd meé, ébóó bán nyéewóó bebaád ké'ε bechóm ngáne me-ε méewóó'.

⁹ Boŋ pen, nzé nyéehel yǎl akób, mod-téé awōŋ mmwaád ké'ε nchóm. Nhóbe nén áyāle édé mboŋ mod áwōŋ mmwaád ké'ε mmwaád áwōŋ nchóm, tómaa áwōŋ esíí é ngine áte wéé né móōnwōŋ áde wéewóó'.

¹⁰ Bōōb-pōó, ne bad ábe béwóó bebaád ké'ε bechóm, saké me nhóbe' pen, Sǎŋgú Yesue mó ahóbe'. Ahóbe nén aá mmwaád eetāŋgenéé nchóm atede.

¹¹ Boŋ nzé édé bán atēdté nchóm, atāŋgéné adyεε ésebán awóó' nchóm ampée, ké'ε bó nchóm bétim ásē. Mwenchóm-me eetāŋgenéé née ánáné mwaád á e'wōŋgé.

¹² Bōōb-pōó, ne nyé bad ábe nyēlyǎgé ásē, me-éé nhóbe' saké Sǎŋgú Yesue. Nhóbe nén meé, mod awē adúbpe awē awóó mmwaád awē eedúbpe boŋ ákwentén aá búmō bēdyεε, ane mod eénānē' ene ndín e mmwaád á e'wōŋgé.

¹³ Nzé mmwaád, awē mó-ε adúbpe awóó mod awē eedúbpe awē akwenténé mó awōŋ, ane mmwaád eetāŋgenéé ane mod atede.

14 Nhóbe nê áyāle nzé mod awě eedúbpe awóó mmwaád awě adúbpe, ákobnéd á'sō é' Dyōb, abé áde ádíí mod nhóg ne mmwaád awě adúbpe. Melemlem, nzé mmwaád awě eedúbpe awóó mod awě adúbpe, ane mmwaád ákobnéd á'sō é' Dyōb abé áde ádíí nhóg ne mod awě adúbpe. Nzé énkēmbé nê, né bãñ ábe ábén bad béchyáa'é béekobnádté á'sō é' Dyōb. Boŋ édé nén bãñ békobnad á'sō é' Dyōb.

15 Boŋ pen nzé mod awě adúbpe awóó mod awě eedúbpe, boŋ awě eedúbpe ahóbé aá e'wóngé é'maa nyétēdē, é'maa. Nzé nê ábénlédé, mod awě adúbpe awóó kunze ádyεε nê ésebán bényágte mó ádyεε á ndáb e e'wóngé. Dyōb áhεde aá syánē débê nsaŋ ne nhóg ne anííí.

16 Wε, mmwaád awě adúbpe Yesuε, kapóg ehle ésōŋ alongé áde awoŋ nchóm awě eedúbpe. Melemlem ne wε mwεnchóm awě edúbpe, kapóg ehle ésōŋ alongé áde awoŋ mmwaád awě eedúbpe.

Paale aá bad bébê ngáne Dyōb dēmpwεdté b́

17 Boŋ pen Sáŋgú Yesuε amaá atíí ngáne alongé áde syánē mod té átáŋgéné abé. Né-ᵛó, syánē mod téé ábê nyaa echě ámbēē áde Dyōb dēmpwεdté syánē aá débê ábē bad. Adén dyaŋ d́óó rílanḡεé mwembé té.

18 Nzé édé mod awě bēmmadté ayag boŋ ámbíd e pónDé Dyōb ápwēd wε, weétímē e'chemléd ahúd ábe é'lúmte nén bãñ bēn'yäg wε. Melemlem, nzé édé mod awě bēnkēn'yagké boŋ Dyōb ápwēd wε, weémwāg-sε b́yāg wε.

¹⁹ Ké béyágé mod ké'ε béeyagéé mó, nê déesaá etógnén. Chõm éche édé etógnén édíi áhíd mbéndé é Dyõb.

²⁰ Mod téé ábê nyaa echë ámbēē áde Dyõb dêmpwεdté mó.

²¹ Nzé wembé ntân á pónidé echë Dyõb dêmpwεdté wε, nén déetagté wε. Boη nzé echon sán ahóbé aá wéebáá ntân ámpē, ékõb áned.

²² Mod awě ambé ntân Dyõb adêhób aá mópwεde mó adíi née kunze áyāle Sánjú Yesuε ahúdé mó á mehaη. Melemlem ne mod awě enkêmbé ntân Dyõb adêhób aá mópwεde mó. Apwεd áde Dyõb ápwédé mó ábélé adíi ntân awě Krīstæ.

²³ Dyõb ácháné nyé ne nkun níme ríchábé ámin. Né-ᵔᵔ, nyéewóglán bad áβε bélânge nyé mekan níme nyétângeéné abel.

²⁴ A-baányan, nhede meé mod téé áwõη alongé áde ánwõngē áde Dyõb ápwédé mó.

*Paale ahóbé tâηgene bekúd
ne bad ábe béewóo bebaád ké'ε bechóm*

²⁵ Bᵔᵔ-pᵔᵔ, tâηgene bad ábe béewóo bebaád ké'ε bechóm, Sánjú Yesuε eelângeé me chõm éche rítângeéné nyé aláa tâηgene ádén atón. Boη ké nê, awõηgen áde Sángwéé áwõηgeéné me ábé mod awě bad bésúmé nlém áyā, mēlāā nyé dyam áde mbíi meé átângeéné.

²⁶ Nnyíne nén meé ngáne ndutul édíi enén pónidé, ébóó bán mod adyεε ésebán awóó' mmwaád ké'ε nchóm.

²⁷ Nzé mod amaá mmwaád awõη, eéēdté mó. Nzé mod eewóo mmwaád, eéhēdē mmwaád awě áwóó'ε.

28 Boŋ nzé mod awóó mmwaád, eébeléé mbéb. Nzé mmwaád-te awóó nchóm eébeléé mbéb. Ké nê-’ε bad ábe béwóó bebaád ne bebaád ábe béwóó bechóm békudé metake híin á alongé ádāb. Nzom eché ekəá boŋ ríhōbē nê edíi, nhede meðé béekudé rímén metake.

29 A-baányan, chōm éche níwémténé nyé aláa edíi nén, póndé eché déwóó á nkōŋsé edé esōŋ. Né-óó, bootya bōob mod awě awóó mmwaád ábíi nén aá mmwaád eésaá chōm éche étómténé etógnén abé áwē alongé.

30 Melemlem ne bad ábe bésudne’, béētédé nê née dyam áde átómténé etógnén abé. Abe bó-’ε bédé menyinje, béētédé nê née dyam áde átómténé etógnén abé. Bad ábe béchane bwēm béētédé bán bwēm ábe béchanéé bōó é’tómténé etógnén abé á alongé ádāb.

31 Bad ábe béhíde mekan mé nkōŋsé ámbíd, béebanné nlém á yāl e rímé mekan. Ayāle mekan mésyāāl ríme débéléé á nkōŋsé-te chíi, mēpě á asóg.

32 Nhede meðé dyamdyam déetagté nyé nlém á abum. Mod awě eewóó mmwaád, Sāŋgwéé móó ákamtanné póndé ésyāāl, ngáne ábenlé-’ε boŋ awóged Sāŋgwéé menyinje.

33 Boŋ mod awě awóó mmwaád mekan mé nkōŋsé mwēn ne mwēn móó ákamtanné póndé ésyāāl. Póndé téé akamtan ngáne átōŋgéné mwaád menyinje awóged.

34 Né-óó, akamtan mekan méβε akamtan ahóg. Mmwaád-te awě eewóó nchóm, ké’ε mwān a mwaád awě eébíi mwēnchóm, Sāŋgwéé móó ákamtanné ne ngáne ábeléé mó. Mekan mésyāāl ríme ábeléé ríme nlém rísyāāl ríbbāg áhed ábel

ásân á'sō é' Dyōb. Boη mmwaád awě awóó nchóm mekan mé nkōñsé mwēn ne mwēn móó ákamtanné. Póndé téé akamtan ngáne átāηgéné nchóm menyīnge awóged.

³⁵ Nhóbe nímén mekan mésyāāl ábel boη méwōηgen nyé. Meehóbéé meé nyētāηgéné mó ahíd. Boη nhede meé níwōηgen nyé áhíd chōm éche étāηgéné ábel boη nyébenle Sāηgwéé ne nlém nhóg.

³⁶ Nzé mod anyíné aá móohēnlé yāl akób ásin káēη mówōη mmwaád awě áhóbé aá mówōó', ákag á'sō áwōη mó ngáne nímē mewēmtēn mélāηgé mó. Nē déesaá mbéb.

³⁷ Boη nzé mod amaá atii áwe nlém-tē, áde béēnyāgtēé mó boη akóbé yāl, amadé-'ε á nlém-tē aá móowōηgé ane mmwaád awě áhóbé aá mówōōη, né abelé dyam áde ádé bwām.

³⁸ Né-ᵛó, nzé mod awóó mmwaád né abelé dyam á bwām. Mod awě mó-'ε akóbé yāl boη eewóo mmwaád abelé dyam áde ábóó bwāmbwam.

³⁹ Mmwaád awě awóó nchóm atāηgéné abé ne nchóm á alongé ádē ásyāāl. Boη pen nzé nchóm awédé, awóó kunze áwōη mod awě ádáá. Ane mod pen átāηgéné abé mod awě adúbpe Sāηgwéé.

⁴⁰ Boη ne me, nnyíné meé mmwaád awě nchóm awédé, ábē menyīnge nzé adyēé nē áde éewóó'ε nchóm ampée. Mbíí nēn meé Edáádāη é Dyōb chōó élyágte me áhób nímén mekan.

8

*Paale ahóbé tāηgene medyé
níme bébagéé e' diidīnge*

¹ Βῶβ-πῶ, nhóbe t̃ngene medyé míme bad bébageé e'díidinge née mende. Edé mbále ngáne éhóbnédé nén bán "Syánē moosyā́l debíí dyaṃ." Ene ndín e e'bíi bé akan ebele mod abâg kúmbe. Boṅ edaṅge éwéde syánē áte.

² Nzé mod awêmtan aá móbíi dyaṃ, ane mod eébíí'é dyaṃ ngáne át̃ngéné abíi.

³ Boṅ nzé mod adáá Dyöb, Dyöb ábelé abíi mó.

⁴ Βῶβ-πῶ, r̃h̃b t̃ngene adyé dé medyé míme bébageé edíidinge née mende. Debíi nén bán e'díidinge, nédé myöb míme bébénlé mekáá, méesaá dyaṃdyaṃ. Dyöb ahóg d̃mp̃en d̃óó ádé.

⁵ Bad béhóbe bán myöb mémp̃ee míme béchagéé bán myöb méde á nkoṅ mí mín ké'ε á nkoṅ r̃sé. Edé-ε mbále bán myöb míme bad b̃en bébénlé mekáá ne besáṅgwéé bé nköṅsé híin bédé.

⁶ Boṅ kénê debíi bán Dyöb ahóg d̃óó ádé. Mó adé Tit̃é awē ahagé ch̃m ésyā́l, mó akáá-'ε boṅ debé á alongé. Sáṅgwéé nhóg mw̃mp̃en-naá ádé. Mó adé Yesu Kr̃st̃ā. Mbwiined ne mó d̃óó béchagéé ch̃m ésyā́l. Mbwiined ne mó d̃ó-'aá dédíi á nköṅsé.

⁷ Boṅ saké moosyā́l abíi mímén mekan. Donḡe á bad p̃en béménténé ábê e'díidinge edúbé abe nyaa eche kááṅ ne chii nzé bedyág medyé, bédii béwêmtan bán bébage mímê myöb edúbé. Nlém méewúu'é b̃ó á abum, né-ῶ béwêmtan bán mímê medyé mébele béēsā́'é á'sō é' Dyöb.

⁸ Ndyééd éh̃ēl̃ē-se éb̃ēl bad bésāṅ á'sō é' Dyöb. Deéh̃ēl̃ē-se debé bad bé mbéb nzé dedyédeé ch̃ó ké'ε debé bad bé bwám áde déedyédeé ch̃ó.

⁹ Nyétéd p̃ondé p̃en ngáne nyébenladté kunze echē ebāgnédé nyé bad bé Kr̃sto. Nyébenlad ch̃ó nyaa eche nyéēbenlé se áben baányanḡ bé Kr̃sto

ábe nímbab nlém méēwúú'é á abum béhún á mbé-
te.

¹⁰ Nzé mod awě nlém méēwúú'é á abum anyíné nyé ábe nyéhóbé bán nyébíí akan nyēdyág medyé á abón áde nímbé myöb, nyéebíí'é bán nén dētéd mó nlém á abum ádyé medyé níme bebágé ábē e'diidinge néε mende-yε?

¹¹ Né-ᵛó, wε awě echagé yǎl wεé mod awě abíí akan, ehede wεé mwǎnyon awě Krīstəə áwédé áwe nló áwē áyāle ábōŋ e'bíí bé akan-ε?

¹² Nzé ebelé mbéb wée mwǎnyon, né Krīstəə móᵛ ebelé mbéb áyāle ebelé mwǎnyon a Krīsto ebébtéd, ebébté-'é mó nlém á abum.

¹³ Né-ᵛó, nzé ndyééd eche nídyákgē ebele mwǎnned a Krīsto ahúne' á mbé-
te, né méedyáá ene ndyééd ámpē mbéd, ábel bon, éēbēlē se mwǎnned ahún á mbé-
te.

9

Kunze e bembapεε bé nlómag ne nsón níme bétǎngéné abel

¹ Mε, Paalε ndíi mod awě awóó kunze nēŋgáne bad bémpēe ábe bédúbpé. Ndíi mbapεε a nlómag. Nnyíné Yesuε, Sǎŋgwée awêd. Nyéē nyêdé nēŋgáne mbakú áyāl e nsón níme Sǎŋgwée ábélé mbwiined ne mε.

² Ké bad bémpēe béēnyīnē mε nēŋgáne mbapεε a nlómag, nyépen nyékobé mε nén bán ndíi mbapεε a nlómag. Abé áde nyédíí ne Sǎŋgwée nyé bēn nyêdé néε e'chem ábe é'lúmte bán ndíi mbapεε a nlómag.

³ Mekan níme níbelé nílǎŋgē bad ábe béhōbe mε mam áyāl médíí nén:

4 Séewóó' é kunze bad áβε sé ndyééd ne mmíítéd áyāl e nsón míme sébelεέ-ye?

5 Séewóó' é kunze átéd mmwaád awě adúbpé Krístəá áhoon sé áκε meκε melemlem ngáne ábíníí bembapεε bé nlómag bébelεέ-ye? Saá nê dóo Sánḡwéé baányan ne Petro bébelεέ-ye?

6 Sé Banabase bēnpεn-εé sētónḡéné nsón abel átəḡεn échəd yǎl-ε?

7 Sánze ehéé ébelé nsón boḡ mwēn átəḡné eche yǎl? Nzé-módé áwōḡ nzag e besabé boḡ eedyág ké epum é sabé ehóg? Nzé-módé adé awě abōḡge nyag ésebán aminε' chó mebíi ákud mílíg?

8 Saké á nsōḡten mí moonyoḡ dēmpεn ríhóbéé mímēn mam, mbéndé e Mose chómpē ehóbé melemlem.

9 Ehóbe nén aá, “Weetádé nyag nsəl eche esálte ngun.” Bəəb-ḡó, nén álúmte nén bán Dyōb átédé nyag etóḡnén-ε?

10 Saá syánē bēn-εé ákoḡtéé ahób-ε? Syánē bēn-εé dekəá boḡ átélé nê. Mod awě akwele nzag abεle aá móḡkūd mbote, mod awě mó-'ε asálte ngun abεle nsón aá móḡkūd ngun.

11 Sé bembapεε bé nlómag sēwéné mekan mé e'dəádəḡ átínté echēn. Edé mbéb nzé sēhědné nyé mekan mé nkōḡsé-ye?

12 Nzé bad bémpēe béwóó kunze áhədεn nyé bwēm, né sēwóó' é kunze áhədεn nyé bwēm tómaa bó-ye?

Boḡ séēbenledéé enén kunze. Sékwěnténé metake mésyāāl, ábel boḡ nén déēkəā' akal dé nkalaḡ mí bwám míme sékaleé tḡḡene Krístəá.

13 Nyébíi bwám bán bad ábe bébele nsón á Ndáb-e-Dyōb, áhed dóo bó-'ε békudéé echab ndyééd.

Melemlem nê dɔɔ bad ábe bébele nsón ábe mende á menyán mé mende, áhed dɔɔ bébelé békud akab dé mende.

¹⁴ Melemlem nê dɔɔ Sánygwéé áhóbé aá bad ábe békale nkalanj ní bwâm békud ntogén wéé bad ábe békankéé ní mé nkalanj.

¹⁵ Kénéé édíí nê, meébenledéé enén kunze ké póg. Saá-kaá nê ákóá bonj nítelé' enén kálag ábel bonj bébenle me ní mén mé syāā. Měkwentén áwé tómaa mod ábel meewóó' nzw̄m ákum ekáá á tâl tângene ní mēm nsón.

¹⁶ Meewóó' é kunze ákum ekáá á tâl áyāle nkalanj ní bwâm ní me ní kaléé. Dyōb dēn dɔɔ áhóbé aá níbel ní mén nsón. Medim ne me nzé meékale nkalanj ní bwâm.

¹⁷ Nzé mmēn-éé mempwēd ní mén nsón ní me níbeléé, né nsine nsábe. Bonj ngáne méepwedeé mó, Dyōb dēn dɔɔ ábágé me mó aá níbel.

¹⁸ Nsábe ní héé-'ō ní kudéé? Nsábe ní me ní kudéé ní díí nēn, nzé nkale nkalanj ní bwâm meéhēdné bad nsábe, meébnlādtē kunze echē ní tājéné abenled akal áde ní kaléé nkalanj ní bwâm.

¹⁹ Ndé ne mmēn, meésáá ásē e mod. Bonj mbelé yāl ntāj a bad bé syāā ábel bonj bad híin bétim bad ábe Krīsto.

²⁰ Ade níbeléé nsón ne bad bé Israel, mbele mam née mod a Israel ábel bonj bétim bad bé Krīsto. Kénéé édíí bán mmēn meésáá ásē e mbéndé éche Mosee, ndé byánán níhíde chó áde níbeléé nsón átínté e bad ábe bēhíde chó. Mbele nēn ábel bonj bétimēn Krīstā.

²¹ Melemlem nzé mbele nsón átínté e bad ábe béesē ásē e mbéndé é Mosee, mbelé níbelé' mam née bó. Mbele nēn ábel bonj bétimēn Krīstā. Nēn

déesaá bán meehídée mbéndé é Dyōb. Mmēn nkoó abé ásē e mbéndé e Krīsto.

²² Nzé ndé ne bad ábe ádab adúbe déewúu' é áte, mbelé mbé née bó âbel boŋ bétimēn Krīstəə. Né-ɔ́, ntimé abé ngáne éboŋnédté mod téé. Mbenlad nzii ké ehée âbel boŋ rísoŋ alongé áde bó doŋge á bad.

²³ Mbele nímén mésyāāl áyāle nhede meé nkalaŋ ní bwām níkanlad, âbel boŋ níkud nnam níme nímé nkalaŋ nípēēē.

²⁴ Nyēbíí bán bad híin bényəgte mehélé boŋ mod nhóg abelé atóm baáb, ákūd-te nsábe. Né-ɔ́, nyényəgte âbel boŋ nyékud nsábe.

²⁵ Mod ké ahée awē aboŋsan ânyəged mehélé abelé ásūdēd yāl. Abele nén âbel boŋ bēwáad mó ekóté é edúbé é mbonja. Echē ekóté éebeméé, ébēb. Boŋ nsón níme sébeléé, sébele mó ákud nsábe níme mébē á ngíndé ne á ngíndé. ²⁶ Nē ákəá meényəgtéé kéchán, meelúméé-'ε ábēm e'chog kéchán.

²⁷ Né-ɔ́, nwéde yāl áte, nsudte-'ε chó âbel boŋ ébel kéchéé éche ríhedéé me ébel. Mbele nén âbel boŋ meémāā bad bēmpēe nkalaŋ ní bwām akale boŋ mmēn meékūdē nsábe.

10

Paale ad bad bébenlád myōb mé metóm

¹ A-baányan, ndəá meé nyékamten ábēd betaa ábe Mosēē ályágté'áá áde bēbídé á Egipto. Dyōb dénlōmē bó mbag echē elyágté'áá bó. Bó moosyāāl bēmpōŋ á edíb é nkŵě te ésebán bēhóó'.

² Apon áde bēmpoŋgé á edíb é nkŵě-te ne abé áde bēmbēē ásē e mbag dēmbēl bēnkūd edusen, bēhídē-'ε Mosēē.

³ Bó moosyā́l bēndyē ndyēéd e edǎ́dǎ́n eche Dyōb dénlōmēē bó mbwiined ne menyáké.

⁴ Melemlem bémmwē-’ε mmíítéd mé edǎ́dǎ́n níme Dyōb dénlōmēē bó mbwiined ne menyáké. Bémmwē mendíb níme Dyōb dēmbenlé boŋ mébíd á ndim e aláá-te echě embé ne bó. Ene ndim e aláá ebédéε Krístǎǎ.*

⁵ Boŋ kénê Dyōb dénkēnwógénné bó bad híin menyíŋge. Nê dēnkǎŋ anwúú bó, ndim ríhētéd bó áte á ehyáŋge.

⁶ Bǎǎb-pǎǎ, nímén mekan mésyā́l médíi nēŋgáne eláŋsén ásim syánē etúu áte, nén deewóó nlém ábel mbéb ngáne bēbélé’áá.

⁷ Nyéēbenlé myōb mémpēe ngáne bó donje á bad bēbénlé’áá. Eténlédé á kálag e Dyōb nén bán, “Ábē bad bēndyēé áse, bēdyāg bwēm, bēmwāg mím, bēbélé-’ε mbinde é mekan.”

⁸ Syánē deekábé mesón ngáne bó donje á bad bēbélé’áá. Nén dēmbě́l Dyōb dénkǎgsēn bó, bó bad móom mé e’kálé mébe ne e’kálé é’láán bēwé epun ehóg.

⁹ Syánē deékāgē Sāŋgwéé ngáne ábēd betaa bēmbenlé boŋ nyǎ éwúú bó.

¹⁰ Syánē deenyonǎd Dyōb áte ngáne bó donje á bad bēbélé’áá. Dyōb dénlōm ángel e kwééd ewúú bó.

¹¹ Mmén mam mésyā́l mēmbenléd ábel mébê nēŋgáne eláŋsén wéε bad bēmpēe, bēntél-le mó áse ásim syánē etúu áte. Syánē dedé bǎǎb á pónde echě nkōŋsé ríkwóge ape á asóg.

* **10:4** Ene ndim e aláá ebédéε Krístǎǎ: Bad bé Israel bémbíi bán ndim e aláá embé ne bó ngáne békágé’áá á ehyáŋge. Paale áá ene ndim e aláá ebédéε Krístǎǎ, Krístǎǎ-’ε abédé ne bó.

12 Né-ᶑᶑ, mod a Krīsto ké ahéé awě awémtné aá mótyēēmē á adúbe-tē átēd pónde ábel bon eékwāg.

13 Mekāgsen ké méhéé nīme métané wε, médii nyaa e mekāgsen echě etáne bad bémpēe. Bon Dyōb áwóó nlém nímé bad béhεle-se bésuim mó nlém á yāl, éemwaa'áa-'ε aá ékud mekāgsen nīme métómé wε. Pónde echě mekāgsen mēpēé, ābēl ebíd mó áte, abε áde ábεé wε ngīne átóm mó áte.

*Paale ad bad béetāngēné
akε á ngande é myōb mémpēe*

14 Né-ᶑᶑ, a-baányan, nyéēbenlé myōb mé metóm.

15 Nhóbe áwēn née bad ábe níbíi mēé béwóó debyéé. Nyébēn nyédol áte chōm éche nílāngēé nyé.

16 Pónde eche syánē ábe dedúbpe démíidéé mb-wendé mí mīm nhóg, debage Dyōb nságnén nīme Krīstāa. Melemlem ne ewεle éche débεlé déladné ádyé, debεlé dedyé yāl echě Krīstāa.

17 Ngáne édíi bán ewεle édíi ehóg, kénéε syánē débúú áte, dedíi yāl póg, áyāle melemlem mé ewεle móó dédyágkē.

18 Nyénōne bad bé Israel, bad ábe bédyāg medyé nīme bébágé nēngáne mendε á menyán, bómpē bélatan á menyán mé mendε ábe Dyōb edúbé.

19 Cheé níkoó'ε ahób hén? Nhóbé mēé e'díidīngε ábe bad bēbagεé mendε, ne nīmē mendε nīme bēbagεé, bédé dyam-ε?

20 Aáy, chōm éche níhóbεé édíi nén mēé, mendε nīme bēbagεé á menyán nīme bad ábe bēédúbpe Dyōb, saké Dyōb dóó bēbagεé mó, e'dāádān bé mbéb bóó bēbagεé. Mēéhēdēē mēé nyéwōn dyamdyan abel ne e'dāádān bé mbéb.

21 Nyéēhēlēē-se nyémfīdē mbwendé míme Sánygwéé nyémfīdē-'ε míme e'dáádəŋ bé mbéb. Nyéēhēlēē-se nyéladné' ádyé ndyééd á menyán mé mendε míme Sánygwéé, nyéladné-'ε ádyé á menyán mé e'dáádəŋ bé mbéb.

22 Dehede Dyöb kónjí ahé áte-yε? Dewêmtan bán dedé ngíne tómaa mó-yε?

Kéchée éche débεléé débεl chó áβε Dyöb edúbé

23 Bad béhóbe nén bán “Dewóó kunze ábel kéchéé éche dédáá abel.” Nê ádé mbále, boŋ saké chöm ésyāāl ébóó abel. “Dewóó kunze ábel kéchéé éche dédáá abel”, boŋ saké chöm ésyāāl épεene nsyáŋ.

24 Nyé modmod eéhēdē chöm éche épiinad mwēmpen bwām boŋ nyéhede chöm éche éwōŋgan bad bémpēe.

25 Nyêwóó kunze ádyé kéchéé éche nyécháné á dyon-tê áde nyéesεdteé dyam áde débĕl boŋ nlém níkəgléd nyé á abum tŋŋene éche chöm éche nyécháné.

26 Eténlédé á kálag e Dyöb nén bán, “Nkōŋsé ne chöm ésyāāl éche édé áwēd-te bédii áβε Sánygwéé.”

27 Nzé mod awē eedúbpe Dyöb alébpé wε áhyε dé ádyé ndyééd, boŋ etíídé wεé mókag, edyé kéchéé éche ábágé wε ésebán esεdte mó dyamdyam tŋŋene ene ndyééd. Nlém méekəglád wε á abum áseded dyam tŋŋene ene ndyééd.

28 Boŋ nzé mod alánjé wε aá “Enén ndyééd bēmbε chó née mendε wεε e'díídingε,” weedyág chó áyāl eché ne ábel boŋ nlém méekəglád modmod á abum.

²⁹ Nédē, saké ngáne nê débenlé bon nlem ríkoglád wε á abum bon bwámbwam ngáne nê débenlé bon aníní mod átagé áte á nlem-tê. Cheé ékəŋ bon nlem nímé ríkoglad mod ampée á abum mbel bon meébenlad kunze echě ebăgnédé mε?

³⁰ Nzé mbagé Dyōb meságnen áyāle ndyééd echě ábágé mε, chán édíí bán mod ampée ahele áhōbē mε mam mé mbéb áyāl, áyāle mbágé meságnen.

³¹ Né-ᵛó, kéchéé éche mod ábeléé, ké ádyāg ké ámwāg, ábele chó ésyāāl nyaa echě ebage Dyōb edúbé.

³² Nyébele chōm téé nyaa echě éepeénné mpuutéđ, ken wée bad bé Israel, bad ábe béesě bad bé Israel, ké'ε mwembé ní Dyōb.

³³ Nyébele mam melelem ngáne mbeléé. Nwane áte áwóged mod asyāāl menyinge áyāl e chōm téé éche mbeléé. Meébēlēē chōm éche ébōhnedé mε bon mbele chōm éche ébōhnedé moosyāāl, ábel bon Dyōb áson alongé á moosyāāl.

11

¹ Né-ᵛó, nyéhíde' nímēm mbeltéd ngáne mε-ε ríhídeé mbeltéd níme Krístəə.

Paale ahóbe tâŋgene akúten dé nló á mwembé-te

² Bᵛᵛb-pᵛᵛ, nkene nyé áyāle nyékamtan mε pónđé ésyāāl, nyéhíde-ε elem éche mén'yāgēđtē nyé.

³ Bon ndəá mεé nyésōŋten nén bán Krístəə mó adé nló ámín e baachóm bésyāāl, mwenchóm-mε abé nló ámín e mwaád. Dyōb dᵛ-áá adé nló ámín e Krístəə.

⁴ Mwēnchóm ké ahéé awě akānne' ké'ε ahóbe mekan á dīn á Dyōb boŋ akútén nló, awógte Krīstəə awě adé nló ámīn echê e'sôn.

⁵ Mmwaád-te awě akānne' ké'ε ahóbe mekan á dīn á Dyōb boŋ eekútene nló, awógte nchóm awě adé nló ámīn echê e'sôn. Nhəŋlén ké nhóg méesaá átíntê ene ndín e mmwaád ne mmwaád awě akəŋné nló.

⁶ Mmwaád awě eekútán nló, émbē mboŋ né ankəŋ mó ngen póg. Ngáne édíf-'aá dyan dé akwágké mmwaád ákəən nló ké'ε ásélen nyon, bebaád békútan mímab nló.

⁷ Mwēnchóm eetəŋgenéé nló akúten ngáne édífí bán ahəg áde Dyōb áhəgé mó á nwágén míme álúmté éche edúbé. Boŋ ahəgé mmwaád álúmed edúbé é mwēnchóm.

⁸ Dyōb dénkənhəgənné mwēnchóm mmwaád, boŋ anhəgén mmwaád mwēnchóm.

⁹ Saá-kaá mmwaád ankəŋ boŋ Dyōb áhəgé mwēnchóm boŋ mwēnchóm mó ankəŋ boŋ Dyōb áhəgé mmwaád.

¹⁰ Ayāl e enén nzəm mmwaád átəŋgéné néε áwóó e'chem á nló ábel boŋ ángel ényín.

¹¹ Kénê-'ε, ngáne dédíí nhóg ne Səŋgwéé, mmwaád éhēlēē-se abé ésebán mwēnchóm, mwēnchóm-me éhēlēē-se abé ésebán mmwaád.

¹² Edé nê áyāle Dyōb dēnhəgén mmwaád mwēnchóm, nê dó-'aá mmwaád-te áchyáá'ε mwēnchóm. Boŋ bwēm é'syāāl é'húú ne Dyōb.

¹³ Nyébən nyénən áte, mmwaád atəŋgéné akáne á elad é bad bé Dyōb áde éekutenéé nló-ye?

¹⁴ Nyaa eche Dyōb áhəgé bad chēn eelúmtéé nén bán édé akwágké mwēnchóm átēde esid ékwog mó á nló bwāmbwam-ε?

15 Boŋ nzé esid échábé mmwaád ébele áboŋ. Dyöb ábágé mó esid née ekúten é nló.

16 Nzé mod ahede áden dyam apenten, chõm ésyāā́l éche íwóó ahób édíi nén mēé, syānē ne mwembé í Dyöb ísyāā́l, deewóó'é nyaa empée eche débēléé ímēn mekan, mwembé í Dyöb-pe méewóó'é.

Ndyééd e Sàngú

(Mat 26.26-29; Mak 14.22-25; Luk 22.14-20)

17 Boŋ tâŋgene ímēn mekan íme ílângeé nyé bōōb, méēhēlēē-se íkēné nyé áyāle nzé nyēbomé ábele Dyöb, mekan mé mbéb móó nyébeleé saké mé bwām.

18 Dyam dé'sō, nwógé bán nzé nyēbomé née mwembé, nkabén íbelé íbé átíntē echên, ndúbpe'-e nén mēé kapóg nē ádé mbále.

19 Nkabén ítângeé abé átíntē echên pen, ábel boŋ bad ábe békoo Dyöb ahíd bényínned.

20 Né-óó nzé nyēbomé nêŋgáne elad é bad bé Dyöb, saké Ndyééd e Sàngú nyédyágkē.

21 Ayāle nzé nyēbomé ádyé Ndyééd e Sàngú, mod téé adyág eche ndyééd ésebán asine waáb, nē ábele baahóg bébâg nzaa, ábíníí'-e mím mékób bó.

22 Nédē édé nén bán nyéewóó'é ímēn mendáb íme nyétângeé medyé adyé nyémwāg-ke mím áte-ye? Ké'e nyényíne' bán mwembé í Dyöb méesaá dyamdyam, nyékwāgtē'-e bad ábe béewóó chõm éche bédyágkē? Cheé nyéhedeé bán ílāa nyé tâŋgene áden akan? Nyéhede bán íkēne nyé-ye? Meēhēlēē-se íbel nê.

23 Nhóbe nén áyāle chõm éche Sàngwéé án'yāgēdtē me chōó me'-e ílângeé nyé nén, ímē

nkuu dēn áde békíí Sǎngú Yesue ntúré, antéd ewele,

²⁴ aságnén Dyõb, ákāb ch́ó áte, áhōbē aá, “Echem yǎl nén, ebǎgnédé áyāl echên. Nyébele nén ákamten me.”

²⁵ Ade bémáá ndyééd adyé ambǎl melemlem ne mbwendé ní mǐm. Anhób aá, “Mmén mbwendé ní mǐm ndii melǎ mékōōlē mé Dyõb níme mímém mekií mésógténé. Nyébele nén pónédé téé ákamten me.”

²⁶ Nén álúmte nén bán pónédé téé echě nyédyágkē échén ewele nyémwāg-ke nímén mǐm, nyékale kwééd eche Sǎngwéé kóǎŋ ne á pónédé eche ápéé.

²⁷ Né-ǎǎ, kénzée awě adyág échén ewele, ámwāg-ke nímén mǐm nyaa eche éébāgē Sǎngwéé edúbé né abelé mbéb tǎŋgene yǎl ne mekií níme Sǎngwéé.

²⁸ Né-ǎǎ, mod téé ásébe ásimen yǎl boŋ adyē ewele, ámwê-’ε mǐm níme Sǎngwéé.

²⁹ Nyébel nê áyāle kénzée awě adyāg échê ewele ámwāg-ke níme mǐm, boŋ eékoo ahé á nlém-tê aá yǎl eche Sǎngwéé ch́ó edé, ákudtéd yǎl nkógsen adyé áde adyágkē échê ewele, ámwāg-ke níme mǐm.

³⁰ Nê d́óǎ akáǎ boŋ nyé bad híin nyéchiitéd, nyékonlé-’ε, donge-’ε béwédé.

³¹ Boŋ nzé syánē desébpé yǎl akáad, né Dyõb déekógsénné syánē.

³² Boŋ Sǎngwéé akáadte, akógsan-ne syánē áyāle mewusé níme débélé âbel boŋ eebáá syánē áyāl áde ákāadtē nkõŋsé.

³³ Né-ǎǎ, a-baányan, nzé nyélǎdné adyé ndyééd e Sǎngú, désinē nhóg ne aníníí.

³⁴ Nyé ké ahée awě nzaa ékóbé, adyé ndyééd á ndáb, âbel boŋ nzé nyélǎdné weébélē akan

áde débēl boŋ Dyōb ákáád wε. Tâŋgene mekan mémpēe, nzé mpedé, dóo mélāā'έ nyé ngáne nyétâŋgéné abel.

12

Nde éche éhúú ne Edǎǎdǎŋ éche Esǎǎ

¹ Bǎǎb-pǎǎ a-baányan, ndǎǎ méé nyébíi mbále tâŋgene nde éche Edǎǎdǎŋ éche Esǎǎ ébageé.

² Nyébíi nén bán áde nyénkêmbíí'έ Dyōb, béntēd nyé nlém á ábum, bépānēd nyé nzii ábele myōb míme méēhōbē akan.

³ Né-ǎǎ, ndǎǎ méé nyébíi nén bán modmod awē Edǎǎdǎŋ é Dyōb élyǎgtéé, éēhēlēē-se ahób aá, “Ebómán ne Yesue.” Nê dó-'aá modmod éēhēlēē-se ahób aá, “Yesue adíi Sǎŋgwéé,” étōmēé nê Edǎǎdǎŋ éche Esǎǎ élyǎgté mó.

⁴ Nde édé nyaa ne nyaa, boŋ melemlem mé Edǎǎdǎŋ móo mébage échē nde.

⁵ Nyaa éche déhele débēl nsón ní Dyōb édé nyaa ne nyaa, boŋ melemlem mé Dyōb móo bébenléé.

⁶ Ngude eche débēnléé nsón edé nyaa ne nyaa, boŋ melemlem mé Dyōb móo débēnladté áde debyéé âbel nsón.

⁷ Mod-téé akudé chōm éche Edǎǎdǎŋ élyǎgtéé mó abel, nê ádé-'ε á mboŋ ní moosyǎál.

⁸ Edǎǎdǎŋ élyǎgte mod nhóg âhób dyam ne debyéé, melemlem mé Edǎǎdǎŋ mélyǎgtē aníníí mod áyǎged bad ne debyéé.

⁹ Melemlem mé Edǎǎdǎŋ míme mébele boŋ mod nhóg awón adúbe aá Dyōb débēl dyam áde áhóbé aá ábel bǎǎb ábēl-'ε dó, nímmē melemlem mé Edǎǎdǎŋ móo mébage aníníí mod ngíne áhood bad.

10 Echê Edǎǎdǎŋ ébage mod nhóg ngíne ábel mekan mé menyáké, ábēl-le aníníí álāngē bad mekan á dīn á Dyǒb. Chóǎ ébágé-'ε bad bémpēe debyéé á̄sōŋten ké chǒm éche mod áhóbéé ké'ε á̄beleé éhúú ne Edǎǎdǎŋ é Dyǒb ké'ε éehúú'é. Melemlem mé Edǎǎdǎŋ mébage mod nhóg debyéé áhób mehób mémpēe, á̄bē-'ε aníníí debyéé átóge mehób míme ábē bad béhóbéé.

11 Melemlem mé Edǎǎdǎŋ móǎ mébele nímén mekan mésyāǎl, abage mod téé echě nde ngáne ádáǎ.

*Elad é bad bé Dyǒb édii néε
yǎl póg eche ewóǎ pág híin*

12 Yǎl édii póg boŋ ewóǎ pág híin. Kénéε édíí-'aá bán yǎl edé pág ne pág, édii yǎl póg. Melemlem nê dǎǎ édíí ne Křístǎǎ.

13 Melemlem nê dǎǎ syánē moosyǎǎl, bad bé Israel ne bad ábe béesě bad bé Israel, betǎŋ ne kunze, Edǎǎdǎŋ ehóg ébélé dekadé edusen boŋ debé pág éche ébélé ene yǎl póg. Dyǒb áhédé-'ε syánē melemlem mé Edǎǎdǎŋ á nlém-tê.

14 Saké pág póg chó ebelé yǎl e moonyoŋ, boŋ pág híin.

15 Nzé ekuu éhele-se éhób aá, “Ayǎle nén meésaá ekáá, meésaá á yǎl e moonyoŋ,” nén déélũmtéé bán eésaá á yǎl e moonyoŋ.

16 Nzé etúu-'ε éhele-se éhób aá “Ayǎle méesaá dīd, méesaá á yǎl e moonyoŋ,” nén déeheléé-se álũméd bán eésaá áyǎl e ene yǎl.

17 Nzé yǎl esyǎǎl embé dīd dēmpen, né chán ámwagké dyam awóg? Nzé yǎl esyǎǎl embé etúu chēmpen, né chán ámwagké chǒm elod awóg?

18 Bonj édé nén bán Dyöb ábánné pág téé á yǎl e moonyonj ngáne ádáá.

19 Nzé pág póg chók yǎl e moonyonj émbēē, ne béechǎgkéké chók bán yǎl.

20 Edé nén bán pág édé hiin bonj yǎl póg chók éwóó chók.

21 Né-ók, did déeheléké-se aláá ekáá aá, “Meetógnenéké wε.” Nlók-ε méeheléké-se níláá mekuu aá, “Meetógnenéké wε.”

22 Etímé anyínned pen nén bán pág é yǎl éche dényínéké bán éesaá dyamyam chók étómténé etógnén abé.

23 Pág é yǎl-le éche dényínéké bán éewóók-é edúbé chók débágeg-é edúbé bwāmbwam. Eche dényínéké-ε bán éeboók-é alúmten, chók dékók-é anən.

24 Pág échě ébók alúmten chók-ε éetógnenéké échén pág. Dyöb ábélé yǎl e moonyonj nyaa échě pág éche ényínnad byánán éesaá etógnén, chók débágeg-é edúbé bwāmbwam.

25 Abelé nê ábel bonj nkabén méebāg á yǎl e moonyonj, bonj pen pág téé éwōngan waáb.

26 Nzé pág e yǎl póg etage, échíníí ésyāál chókmpē ébelé étage'. Nzé pág póg ekudé mekenag, échíníí ampē ébelé éwógén mó menyinjε.

27 Né-ók, nyé moosyāál nyédii yǎl échě Krístəə, nyé mod téé-ε nyédii pág échě ene yǎl.

28 Dyöb ábágé bad nsón á mwembé-te nyaa ne nyaa. Asébpé ábelé baahóg bambapεε bé nlomag, ámbid ené, ápwεdé bekal bé'dáádənj bonj apwεdé-ε bemeléede. Ampwǎd-te bad ábe ámbéé ngíne ábel menyáké, ápwǎd bad ábe ábágé ngíne áhood bad, ápwǎd bad ábe béwōngan bad, ápwǎd bad ábe

ábágé debyéé âlyáged bad, ápwēd-te bad ábe ábágé debyéé âhób mehób mé bad bémpēe.

²⁹ Saké bad bésyāāl bédé bembapεε bé nlómag, saké bad bésyāāl bédé bekal bé'dāádəη, saké bad bésyāāl bédé bemeléede, saké bad bésyāāl bédé bebel bé menyáké.

³⁰ Saké bad bésyāāl Dyōb ábágé ngíne áhood bad, saké bad bésyāāl Dyōb ábágé debyéé âhób mehób mémmpēe. Saké bad bésyāāl Dyōb ábágé debyéé âtóge mehób mémmpēe.

³¹ Nyébane nlém áyāl e ndε éche étómténé etógnén abé.

Kénê-ε μεédii nlúméd nyé nzii empée echě etómténé abon tómaa échíníí.

13

Edé etógnén ádəη bad

¹ Nzé nhóbe mehób mé baányon ne mé ángel bon meédəə baányon, ehób échēm édii née nkóη níme níbele ntəgag ké'ε ngəη echě békumεé.

² Nzé mbyéé' nkalan ní Dyōb akal, nzé nsōηtan mekan mé e'koηnéd mésyāāl, nwóó debyéé ásyāāl, nwóó-ε adúbe áde níhele-se nhób μεé mbəəd éhəηlən e'dii, bon meédəə bad, né meésáá dyamdyam.

³ Nzé mbage bad chōm ésyāāl éche níwóó, nkwxnténé-ε áβε echem yāl μεé béhyád, áde meédəə'ε baányon, bwām é'héé nê ábélé με?

⁴ Mod awě adaó bad, abelé áwesán, álūmtē-ε e'bon bé nlém. Eesídéé bad, eésáá kúmbe.

⁵ Mod awě adə́ bad, eebágkě ewanġe, eéhēdtēē eche yāl chēmpen bwām, eewámsánné alij, eékoŋgēé-’ε mekan mé mbéb á nlém-tē.

⁶ Mod awě adə́ bad, eewógnéé mekan mé mbéb menyiŋge, mekan níme métáŋgéné móo áwógnéé menyiŋge.

⁷ Mod awě adə́ bad, akobe mekan mésyāāl, adúbpe mekan mésyāāl, awóo’ e’lyág bé nlém pónđé ésyāāl, ákaá-’ε nlém pónđé ésyāāl.

⁸ Edanġe éēwōō’ é asóg. Ahób dé mehób á dīn á Dyōb dēpě á asóg, ahób dé mehób mémpēe, ámaa, debyéé-’ε áde mod áwóo’ é, ápē á asóg.

⁹ E’bíi bé akan ábesyánē béélónéé mbon, akal áde sékaléé nkalaŋ ní Dyōb, séelónéé mbon.

¹⁰ Boŋ áde mekan níme mélóné mbon mépēé, mekan níme méelone mbon mépě á asóg.

¹¹ Ade níbéde mwēndem nhóbé’áá née mwēndem, nímmēm mewēmtēn mémbēē mewēmtēn mé mwēndem, ndolé-’ε akan áte née mwēndem. Boŋ bəəb áde nídíi mod ambáá, ntědté abé á mwēndem.

¹² Denyíne chōm bəəb nēŋgáne á ebudbud-tē á dyené-te. Boŋ ámbíd e pónđé, syánē déēnyīn Dyōb, syánē ne mó dénənné-’ε e’só ne e’só. Meébudéé Dyōb asōŋtēn bəəb bwām, boŋ pónđé eche ehúé’ mēsōŋtēn mó melemlē ngáne mómpē ásōŋtēnnē mē bwām.

¹³ Né-əó, metəte méláán médé; áwónġ adúbe, áwónġ e’lyág bé nlém ne áwónġ edanġe. Boŋ atəte áde átómténé etógnén abé áfínté e nímmén méláán, ádíi áwónġ edanġe.

Nde émpēe éche éhúú ne Edáádəŋ

¹ Nyéwan áte ádəŋ bad, nyéwōŋ-’ε nlém áte ákud mende míme Edáádəŋ ébagεé nyé, bwâmbwam áláa bad mekan á ðĩn á Dyöb.

² Mod awě ahóbe mehób mémpēe eehóbéé wée bad boŋ wée Dyöb dóo áhóbεé. A mbále, mod-mod eesōŋtánné dyam áde áhóbεé. Kénεε ngine e Edáádəŋ élyágtεé mó áhób mekan, bad ábe áláŋgεé míme mekan, ne bó, míme mekan méđi mekan míme mod éēsōŋtānnē.

³ Mod awě ahóbe mekan á ðĩn á Dyöb, ahóbe mó áwōŋgen bad áwúu áte, áwéd bad nlém á abum ne áhóded bad nlém á abum.

⁴ Bad ábe béhóbe mehób mémpēe béwōŋgan échab yál boŋ bad ábe béhóbe mekan á ðĩn á Dyöb béhóbe mó áwōŋgen mwembé řsyā̄l.

⁵ Ndáá meé nyé moosyā̄l nyéhóbe mehób mémpēe, boŋ métōmtēn adəŋ meé nyéhóbe mekan á ðĩn á Dyöb. Mod awě ahóbe mekan á ðĩn á Dyöb, atómé mod awě ahóbe mehób mémpēe, éetóméé né atógke’ chōm éche áhóbεé ábel boŋ áwōŋgen mwembé.

⁶ Né-ṵó, a-baányan, nzé mpedé áwēn boŋ nhóbe mehób mémpēe, né chán méwōŋgēnnē nyé? Meéhēlēε-se nwōŋgēn nyé ké mwātiíd, nzé meépeεne dyam áde Dyöb álúmté me, ké’ε dyam áde mbíí, ké’ε áhób mekan á ðĩn á Dyöb, ké’ε dyam áde méyāgēdtē nyé.

⁷ Détéd elon ne ndingé, bwēm ábe béesě á alongé ábe bébenladté ákum mesíε. Chán mod ahεle se abíí nkāŋgεé míme békónεé nzé béekumé mó bwām.

⁸ Nzé mod ahεde elon atōŋ éche élād bad áke á bel, boŋ eetóo chó bwām, né chán ahεle ábel boŋ

bébōηsēn akε á bel?

⁹ Nε dáo édíí ne nyé ámpē. Nzé nyêhede mehób mémpēe ahób boη nyêhóbe mekan míme méewōo nsōηten, nzé mod eebíi dyam áde nyêhóβεέ, né nyêhóbe nêηgáne epub éche étóme’.

¹⁰ Mehób médé á nkōηsé-te nyaa ne nyaa, ké ehóg-ke éesaá éche éewōo nsōηten.

¹¹ Boη nzé meebíi ehób éche mod áhóβεέ, mod awě ahóbe chό ábē nken áwēm, με-ε mbé nken áwē.

¹² Ngáne nyêhedeé bán nyébele mekan míme Edaðádəη é Dyōb élyágtεé nyé abel, nyéwane áte nyébele’ míme mébele boη mwembé ríkwogé bwām.

¹³ Né-óó, mod awě ahóbe mehób mémpēe atəηgéné akáne ábel boη Dyōb ábel mó átóge chōm éche áhóβεέ.

¹⁴ Ayāle nzé nkānne’ ne ehób émpēe, échēm edaðádəη chόó ékānne, boη mmēn meebyéé’ é chōm éche ríhóβεé.

¹⁵ Cheé-ō rítəηgéné abel? Ntəηgéné akáne ne échēm edaðádəη, nkáne-ε ne mímēm nlém. Měkōnē nkəηgé ne échēm edaðádəη, ríkōnē-ε ne mímēm nlém.

¹⁶ Nzé ebenlad échōη edaðádəη áβε Dyōb mekenag, chán mod a ngēn awě adé ásē, áhōbpē aá, “ébē nē” áde éēsōηtenεé dyam áde éhóβεέ.

¹⁷ Ehele-se ékené Dyōb bwām boη dyam áde éhóβεέ déewōηgān mod awě alyagé ásē ne awōηgen dēn.

¹⁸ Nságnan Dyōb nén μεé nhóbe mehób mémpēe tómaa nyé bad bésyāā,

¹⁹ boη kénē, nzé dedé á mwembé-te, mēdəη μεé ríhób metote métáan míme méwōη nsōηten, ábel

boŋ bad béyáge, tómaa áhób metote ekálé dyôm míme méēwōo nsōŋten.

²⁰ A-baányan, nyéewóó' mewēmtēn mé bēndem. Nyébē pen née bēndem ábe béebíi chōm éche mbéb ídíí. Boŋ á mewēmtēn nyébē née bad ábe békwógé.

²¹ Eténlédé á kálag e Dyōb nēn bán με Σάνγwée nhóbe nēn μεέ,
 “Mēbelén bad ábe béhóbe mehób mémpēe áhób wēe ábēm bad.
 Mēbelén e'bēb é' beken bé bad, boŋ ké ábēm bad béewógēnné με.”

²² Né-ός, ahób dé mehób mémpēe ádíi e'chemléd ne bad ábe béedúbpe, saké ne bad ábe bédúbpe. Ahób-pe mekan á dīn á Dyōb ádíi e'chemléd ne bad ábe bédúbpe, saké ne bad ábe béedúbpe.

²³ Nzé bad bésyāāl béhóbe mehób mémpēe áde bédíi á mwembé-te, boŋ donge á bad ábe béēsōŋtene mekan mé Dyōb ké'ε bad ábe béedúbpe Křistāa bésólé, béehóbpé bán nyēpag mīn-ε?

²⁴ Boŋ nzé bad bésyāāl béhóbe mekan á dīn á Dyōb, boŋ donge á bad ábe béēsōŋtene chōm éche béhóbeé ké'ε bad ábe béedúbpe Křistāa bésólé, awóg áde béwōgkē nkalaŋ í Dyōb, débēl bébíi bán bébele mbéb, békwédé nkáá á'sō é Dyōb.

²⁵ Mmē nkalaŋ méhūd bó mekan míme bēnkoo'é á nlém-tē. Békwě'-ε ásē, bébagé Dyōb edúbé béhōbē nēn bán, “Ne mbále, Dyōb áde áfíntē echēn.”

Paale ad mpuutéd mébāg á mwembé-te

²⁶ A-baányan, chōm éche íkoo'é ahób édíi nēn, nzé nyēlādné á mwembé-te, mod nhóg abelé awōŋ nkāŋgé, ampée'-ε awōŋ chōm éche áyágtēé, ampée

awón dyam áde Dyöb álúmtē mós, ampée awon dyam áde áhōbpē á ehób émpēe, ampée-’ε abé awě atógke mehób mémpēe. Nyébele nímén mésyāāl áwóngen mwembé.

²⁷ Nzé bad béhóbe mehób mémpēe, bad béēhōbē tómaa beláán, bó mod téé áhōbē ámbíd eche waáb amáá ahób. Mod-te atánjéné abé awě atógke chóm éche béhóbé.

²⁸ Bon nzé mod eésē awě atógke’, mod awě ahóbe mehób mémpēe, atánjéné néε ádíbé nsal, áhōbē áwe nlém-tē ne wée Dyöb.

²⁹ Ade bad béε ké’ε beláán belánjé bad mekan á dīn á Dyöb, ábíní bad bétánjéné béwōglān ábíi ké chóm éche béhóbé étánjéné.

³⁰ Bon nzé mod adé á mwembé-te awě akudé nkalan níme Dyöb álúmtē mós, mod awě ahóbe akan ásōg ahób.

³¹ Nyé moosyāāl nyélánje bad mekan á dīn á Dyöb nhógē-nhógē ábel bon mod téé áyágke, nē áwéde-’ε mod téé nlém á abum.

³² Nde echē Edāádān ébagé bad áláa bad mekan á dīn á Dyöb, edíi nde éche mod awě ahóbé nímé mekan áhēleε ákamlēn.

³³ Dyöb déesaá Dyöb áde áπεεne mpuutéđ, nsan móo áπεεné.

A mwembé ní bad bé Dyöb rísyāāl,

³⁴ bebaád bédib nsal nzé bédé á mwembé-te, bétánjéné abé ásē e baachóm ngáne mbéndé e Mose éhóbé.

³⁵ Nzé dyam adé áde bédás abii, bésēdēđ ábab bechóm á ndáb. Ayāle édé akwágké mmwaád áhób dyam á mwembé-te.

³⁶ Nyé bad bé Kōrinto, áwēn dōo eyale é Dyöb

émbĩdtē-yε? Awēn dēmpeɛn-εé eyale é Dyõb êmpεé-yε?

³⁷ Nzé mod anyíne yǎl aá módē mod awě alânge bad mekan á dǐn á Dyõb, ké'ε aá mówõ ndε echě ehúú ne Edəádəη, atəηgéné abíi aá dyam áde rítenléé nyé ádíi dyam áde Səηgwéé áhóbé aá nyébel.

³⁸ Boη nzé ahóbe aá mósóhídté mímén mekan nyéhúd mó mǐd áyǎl.

³⁹ Né-óó, a-baányan, nyébane nlém áláa bad mekan á dǐn á Dyõb, boη nyéekáá bad áhób mehób mémpe.

⁴⁰ Nyébele mekan mésyāǎl bwām, nyébele-'ε mó nyaa echě etəηgéné.

15

Mpuu míme Yesu Krístə

¹ Bəəb-pəó, a-baányan, nkamtan nyé nkalan ní bwām míme mēnkáléé nyé. Nyēnkob mó, mbéle-'ε nyésūmnédé áyǎl e adúbe áde nyéwóó.

² Nzé nyédíi nyéchəηnéde áyǎl e mímē nkalan míme édíi bán mósó nípeene e'soóson, né nyéekūd e'soóson, éetóméé né adúbe áde nyédúbpé Krístə, dó-'ε áde ngēn.

³ Menkalé nyé nkalan míme mēnkudté, mó-'aá rítómténé etógnén abé. Mmē nkalan, rídé nén bán Krístə anwé á nló mímēd ngáne éténlédé á kálag e Dyõb.

⁴ Eténlédé nén bán bēnlímē mó, ápūū ámbíd e e'pun é'láán.

⁵ Anlúméd Petro yǎl, boη ámbíd e pónde anlúméd-te ábíníi bembapeε yǎl.

⁶ Ambīd enê, tómaa mbwókɛl é bad étáan ábe béhídé'áá mó anlúméd bó yǎl alúmed ahóg. Abê bad híin bédii bédé á alongé chii, donje-ε bémáá awé.

⁷ Ambīd e pónde anlúméd Jemse yǎl, boŋ alúméd-te ábíníi bembapεε bé nlómag bésyāǎl yǎl.

⁸ Kááhne á asóg anlúméd mémpē yǎl, kénéε édíi bán ndíi mod awě bēnchyāā'é á pónde echē bad bēnkēmbíí'é bán béchyáa.

⁹ Nhóbe nén áyāle átínté e bembapεε bé nlómag bésyāǎl, méε ndé mbapεε awě éesě etógnén. Meékwognedéé áchagned ké néε mbapεε a nlómag áyāle menhé bad bé mwembé ní Dyōb á meséb.

¹⁰ Boŋ nsimé ní Dyōb mbéle ndé chōm éche nídíi. Mmē nsimé níme Dyōb ábagé-ε me, méesaá ngēn. Boŋ pεn mbelé nsón tómaa ábíníi bembapεε bé nlómag, kénéε édíi bán saké mmēn mbelé'áá nímé nsón, nsimé ní Dyōb móo mbédé ne me.

¹¹ Né-óó, ké émbē bán meé nkanlé nyé nímén nkalan, ké'ε bembapεε bé nlómag ábíníi bóó békálé mó, chōm ehóg chóó syāābōó moosyāǎl sékaleé, mó-áá nyédúbpé.

*Paale áá ngáne Dyōb dēmpuúdté Krīstəə,
bad bé Krīsto bómpē bēpuú*

¹² Bəəb áde sékale-áa nén bán Krīstəə apuúde, chán-nō nyé donje á bad nyéhεle nyéhōbē bán bad ábe béwédé béepuú'é?

¹³ Nzé ahób áde nyéhóbeé nén bán mpuu méesaá ámbīd e kwééd áde mbále, né élúmte bán Krīstəə enkēmpuu'é.

14 Nzé Krīstəa enkēmpuú-'ε, né nkalan nīme sékanléé nyé méesaá dyamdyam, né áden adúbe ámpē déesaá dyamdyam.

15 Né nê álūmte nén bán sékale Dyōb metóm áyāl ahób áde séhóbεé bán apuúdté Krīstəa. Boη nzé édé mbále nén bán bad béepuudéé nzé béwédé, né Dyōb dēnkēmpuúdté Krīstəa.

16 Nzé bad ábe béwédé béepuudé, né káσηne Krīstəa éepuudéé.

17 Nzé Dyōb dénkēmpuúd-τε Krīstəa, né adúbe áden déesaá dyamdyam, né nyēdii nyēdé-'ε á mbéb te.

18 Né élūmēd-τε bán bad ábe bédúbpé Krīstəa ábe béwédé, bébóó-'ε.

19 Nzé e'lyág bé nlém ábe séwóó áyāl wée Krīstəa é'sógé áyāl e áden alongé dēmpen, né bad bétāηgéné se ngəl atōmten dé awóg tómaa nyaa eché béhele béwóg bad bēmpēe.

20 Boη édé mbále nén bán Dyōb ápuúdté Krīstəa. Mó abédé mod a'só ápuu átīnté e bad ábe béwédé.

21 Dyam áde mod nhóg ábélé dóo ákáá boη bad béwāg. Melemlem nê dóo dyam áde mod nhóg ábélé ákáá boη bad bépuudé'.

22 Bad bésyāāl béwē abé áde bédíi mod nhóg ne Adamε, melemlem nê dóo Dyōb débenlé bad bésyāāl bépuu abé áde bédíi mod nhóg ne Krīstəa.

23 Mod téé ápuú eche póndé eché átāηgéné apuu. Krīstəa, mó awě adé mod a'só ápuu, áde ápéé ámpē, bad ábe bédé ábe Krīsto bómpē bépuú.

24 Ambīd enê, asóg dépě. Ene póndé e'dəádəη ábe é'kamlan, benkamlenε ne ngīne é nkōηsé, Krīstəa āmad echab ngīne. Dó-'aá ábéé nkamlen wée Dyōb Titée.

25 Krīstəə ābē á nkamlɛn káəŋ Dyōb ābēl atóm ābē bad bé ekəyí áte, ābānē-’ε bó ásē echē.

26 Mod a ekəyí awē ádimténné atóm áte adii kwééd.

27 Edé nēŋgáne éténlédé á kálag e Dyōb nén bán, “Dyōb ābánné mekan mésyāāl ásē echē.” Elúmtɛ bwām pɛn nén bán mekan mésyāāl míme Dyōb áhóbé aá móbānné ásē e Krīstəə, Dyōb dɛn déesaá áwēd-te.

28 Ade bwēm ésyāāl bémadté abé ásē e nkamlɛn míme Krīstəə, mwɛn-nɛ Mwān a Dyōb, ābē ásē e Dyōb. Dyōb dɔ-’aá ābánné bwēm é’syāāl ásē echē, ābɛl boŋ mwɛn Dyōb-pɛ ákamlɛn bwēm é’syāāl ngen póg ne ngen ésyāāl.

29 Bəəb-pəó, chán-nō déhōbpē áyāl e bad ábe békúdɛ edusɛn á nló mí bad ábe bémáá awé? Nzé bad ábe bəwédé bəetəgné apuu, cheé ékəá boŋ bédusán bad á nló mí bad ábe bémáá awé?

30 Cheé-ə ékəá boŋ sébāg á nsəl ní kwééd pónndé tée?

31 A-baányan, mbāg á nsəl ní kwééd epun tée. Kúmbe eche mbééné nyé abé áde dédíi mod nhóg ne Yesu Krīstəə, Sāŋgwéé awêd, chó ekəá boŋ níhōbē nén.

32 Nzé nnənɛ chó á nyaa e moonyon, nsyáŋ ké nhóg méesaá né nzum éche syāābe e’loo nyam séwánáá á Efesus. Boŋ nzé édé nén bán bad ábe bəwédé bəepuú’é, né dɛéhōb bán, “Dédyāg, démwāg-kɛ, áyāle chán mod áwē.”

33 Nyéédōgnād, “E’chon bé mbéb é’bēbte abé á bwām.”

34 Nyéewóó mewêmtɛn ámpē néɛ e’yókél é’ bad, nyésóg-kɛ mbéb abɛl. Nyé doŋge á bad nyéebíi’é

Dyöb. Ngáne ríhóbéé nén, nén átəngéné nyé akwágké akóbed.

Ngáne bad ábe béwédé bépuú'é

³⁵ Bonj mod əsedéd aáken, “Chán Dyöb áhəle ápuú bad ábe bémáá awé? Yəl éhéé béwəngé?”

³⁶ Eyókél é chəm, nzé ewené mbál-e-bü éəbēlē-sə ewé bonj ekág-ε?

³⁷ Chəm éche béhágkē á ndəəb édii mbál ngən, saké alín á bwel əsyāəl áde ákwoge' béwénéé, bonj mbum, kapóg mbum e ngun ké'ε mbum empée.

³⁸ Dyöb dən dóo ábele' ngáne ádáá bonj mbál téé ríwón yəl eche ríwóo. Abage mbál téé yəl eche etəngéné.

³⁹ Yəl é bwəm é'syāəl ábe é'dé á alongé éesaá nyaa póg. Baányonj béwóo echab ndín e yəl, nyam éwóo echáb, menən méwóo echáb, súu-'ε éwóo echáb.

⁴⁰ Bwəm é'dé ábe é'dé á nkonj mímín, é'bé-'ε ábe é'dé á nkonj rísé. Bwəm bé nkonj mí mín é'wóo ábāb e'bonj ábe bwəm bé nkonj rísé béəwóo'é. Bwəm bé nkonj nsé-'ε é'wóo ábāb e'bonj ábe bwəm bé nkonj mí mín béəwóo'é.

⁴¹ Etondεε awóo ábē e'bonj, ngən ewóo ábē, betintinε-'ε béwóo echáb nyaa e e'bonj. Káəne átínté e betintinε, e'bonj ábe béwóo é'dé nyaa ne nyaa.

⁴² Nén dóo ébē ne bad ábe bépuú. Yəl echē bélimméé edii yəl eche ebébe', echē Dyöb ápuudtéé edii yəl echē eebébé' ámpē.

⁴³ Yəl eche bélimméé eebágké elóon, eewúē-'aá áte. Nzé Dyöb ápuúdté chó eboo' elóon bwāmbwam, ewúε-'ε áte.

44 Ade bélimmεέ chό ebágkē yǎl e ekob, boη nzé Dyōb ápuúdté chό ebágke yǎl e edǎádəη. Yǎl e ekob edé, yǎl e edǎádəη-’ε ámpē edé.

45 Eténlédé á kálag e Dyōb nén bán “Mod a e’só, Adamε, Dyōb dēnhəg mó abé nhəgtéd míme níwóó alonjé.” Boη Adamε a ndimτεη adii Edǎádəη éche ébage alonjé.

46 Saké mod a edǎádəη mó asébpé abé. Mod a ekob mó asébpé abé boη mod a edǎádəη mó-’ε ábág.

47 Mod a’só ambíd á nkōηsé, bēnhəgēη mó ndǎǎb. Awe mó-’ε ampě ámpē, ádyōb dǎǎ abídé.

48 Bad ábe bédé á nkōηsé te, bédé nēηgáne Adamε awě bēnhəgēnné ndǎǎb. Abe bó-’ε bédé bé dyōb, bédé nēηgáne ane awě abídé ádyōb.

49 Ngáne déwágné mod awě béhágné ndǎǎb, melemlēm nē dǎǎ déwāgēnnē ane awě abídé ádyōb.

50 A-baányəη, chōm éche ríhóbεé édii nén, chōm éche édé á nhəgtéd ní yǎl e ekob ne mekií éehelée-sε ékūd bwēm bé nkamτεη ní Dyōb. Eche chό-’ε éebé abé ne abé éehelée-sε ékūd bwēm ábe bébē abé ne abé.

51 Nyélám metúu nyéwōg dyam áde rílanjεé nyé áde bad béēbíi’é. Syánē bad bésyāǎl déewáá’, boη pεη Dyōb déhəηlén syánē baásyāǎl

52 á esōj é pón dé. Mmē nhəηlén mébē á mehélé-te, nēηgáne mod áhελεεε ápēbéd díd. Nén débεnléd áde bétōηgē elonj é asóg. Ade bétōηgē elonj, bad ábe bēwédé bēpuú, bēewáá ámpē, Dyōb déhəηlén-ne syánē baásyāǎl.

53 Ene yǎl eche ebǎǎde’ ētīm yǎl eche éebǎǎ ámpē, yǎl eche chό-’ε ewág ētīm yǎl eche eewág ámpē.

54 Pón dé eche yǎl echě ebǎǎde’ étimmé yǎl echě

eéb̄dē', ne áde yǎl eche ewâg étimmé yǎl echē eewág, élōn ngáne éténlédé á kálag e Dyōb nén bán,

“Kwééd eesaá ámpē ne abé dēn, Dyōb átómé chó áte.”

⁵⁵ “A-kwééd, héé echoŋ ngíne átóm mod áte édíí? A-kwééd, héé echoŋ ngíne áwóged mod e'wε édíí?”

⁵⁶ Mbéb mósó ríkáá boŋ kwééd ewóŋ ngíne áwóged mod e'wε, ngíne e mbéb-pe ehúú ne mbéndé.

⁵⁷ Boŋ sēságnan Dyōb, mós abelé boŋ sétóm mbéb áte mbwiined ne eched Sán, Yesu Krístā.

⁵⁸ Né-ᵛᵛ, a-baányan bé edəŋge, nyésunen bwâm, dyamdyam déēhōbtē nyé mekuu ásē. Nyébē nyékεene nsón míme nyébenléé Sánᵛwéé á'sō. Nyébíí nén bán nsón míme nyébenléé Sánᵛwéé ké nhóg méesaá ngēn.

16

Bésánᵛgé mōné áwóŋgen bad

¹ Bᵛᵛb-pᵛᵛ, ríláa nyé tənᵛgene mōné míme nyēnladté áwóŋgen bad bé Dyōb. Ngáne ménlāā'é mwembé míme rídé á Galesia mēé bēbel, melemlen nē dós nyémpē nyétəŋgéné abel.

² Sōndé téé nyé mod téé áhūd mwā mōné ákoo. Nén ábé nchoo ne mod téé nímē nkudág. Nzé nyébelé nén, nē débēl nzé mpedé, nyéetəŋgné mōné asaa ámpē.

³ Nzé mpedé, bad ábe nyépwédé, mēlōmēn bós kálag ákεen nímē mōné míme nyeládé á Jerusalem.

⁴ Nzé ébós bán mémpē ríkε, né béwoón mε.

Ntíi míme Paalε ábéle

5 Měpě áwēn nzé mmaá atóm á mbwóg e Masēdonia, áyāle nwóó mewēmtēn átóm á mbwóg e Masēdonia.

6 Kapóg mēdyēé ne nyé, nhēle mbé-'ε ne nyé póndé esyāál echē ahéb ábágkē ngíne, ábel boŋ nyéwōŋgen με áκεεν échēm eke á'sō hōm ké áhéé áde nkagké.

7 Meédəə'é mēé dényínen ámīn-ámīn. Nwóó mewēmtēn ábé ne nyé mwă etūn é póndé nzé Sāŋgwéé akwēténé.

8 Mēdyēé á Efesus hén káəŋ ne á póndé e ngande e Pentekos.

9 Nzii enēdnédé με hén ábel kase e nsón, kénéε édíí bán bad híin bédé ábe bētāŋgan με.

10 Nzé Timotiε apedé áwēn, nyényín bán nyékobé mó nken áyāle melemlēm mé nsón níme Sāŋgwéé níme ábeléé, móo mēmpē níbeléé.

11 Modmod eenyíne mó nkóŋtéd. Nyéwōŋgen mó áκεεν échē eke á'sō ne nsan ábel boŋ bóəbe bad bé Krīsto bémpēe ábe nsinēé, bētān με hén.

12 Bəəb-póó, tēŋgene awesyánē mwānyan Apo-lose, menwéd mó nlém á abum bwāmbwam áhye dé anən nyé nchoo ne bad bé Krīsto bémpēe, boŋ pen eewóó'é nlém ápe bəəb. Nzé etál ébágnédé mó, āpě.

Melēntēn mé asóg

13 Nyétéd póndé, nyésumēn á adúbe-tē. Nyéwúu nlém á abum, nyéwúu áte.

14 Kéchéé éche nyébeléé, nyélúmed bán nyédəəó nhóg ne aníníí.

15 Bəəb-póó a-baānyan, nyēbíí nén bán abum á ndáb áde Stefanuse dóo ábédé dé'só á mbwóg e

Akaya âdúbe Krīstəə, bébágé-'ε echab yǎl âbele bad bé Dyōb. Ncháa nyé nén mεé,

¹⁶ nyébê ásē e ndín é bad néε échén, ne ásē e mod ké ahée ampée awě abele nsón néε nímén.

¹⁷ Ndé menyinje ne επε éche Stefanase, Fōtunatusε ne Akaikusε. Bépédé áyāle bébélé nsón míme nyéntāngēnnē abel.

¹⁸ Bévédé με nlém á abum ngáne bēnwēdtē nyémpē nlém á abum. Kéchée éche échén ndín é bad éhóbεé, nyētāngéné bó edúbé abε.

¹⁹ Mwembé míme rídé á mbwóg e Esia rílómmé nyé melentεn. Akwilaa bó Prisilia ne mwembé míme níbome áwab ndáb, bélómmε nyé melentεn ne nlém nhóg á đín áde Sāngwée.

²⁰ Abεd baányan bé Krīsto ábe bédé hén bélómmé nyé melentεn.

Nyéhê nhóg ne aníní tǎl.

²¹ Με Paale, mβenlad échēm ekáá átele nyé nímén melentεn.

²² Kénzée awě eédəə Sāngwée ebómán ne mó. A-Sāngú awêd, hyǎg!

²³ Nsimé míme Sāngú Yesuε níbê ne nyé.

²⁴ Ndəó nyé bad bésyāēl á đín áde Yesu Krīstəə.

Mel̃ Mékōōlē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022

0143729f-907e-5098-b6ce-63b1629b8e48